

Mpóso Ya Ntuku

Nsambo Ya Danyeले



Matondi mingi mpenza, Ndeko Neville. Mbote, baninga. Ezali litómba kozonga lisusu awa na tabernacle, na ntongo oyo, mpo na kokóba na Nsango ya nkembo oyo, oyo tozali kosala makasi mpo na kolimbola, *Mpóso Ya Ntuku Nsambo Ya Danyeले* oyo. Mpe tozali na esengo ya komona bato mingi mpenza, oyo bayangani awa, na mokolo ya molungé oyo, mpe ata bongo, bólimbisi ndenge tozali na bisika ya kofandisa bato te. Komona bato bakangani-kangani esika moko ndenge wana, mpe batelemi zinga-zinga, ezali mpenza malamú te. Mpe lokola bofandi mpenza malamú te na ndenge bosengelaki, ékokomisa yango mpasi mpo na bino kososola. Kasi tokosala nyonso oyo tokoki kosala mpo na kosilisa yango noki.

2 Mpe—mpe, lelo, nazolikia ete boko, soko nakoumela mwa moke, ete bokolimbisa ngai, mpo oyo ezali ntango ya kobeta nsété ya Liteya oyo, ntango mpenza ya kobéta nsété. Tokaboli yango na biteni misato mpo tókoka koyeba mpenza malamú kososola yango.

3 Sikawa, na bosolo, li—liyangani oyo esangani awa eyebi ete oyo, to Mateya oyo, ezali kotiama na bande. Mpe ezali kotindama na mokili mobimba. Pene na bikólo nyonso mpenza eyambaka ba-bande yango, na mokili mobimba. Mpe nakolinga koloba boye na baoyo bazali koyoka bande oyo, ózala esika nini, na eteni nini ya mokili yo ozali, ete ekoki kozala na makambo mosusu awa, oyo ntango mosusu okoki koyokana ná ngai te, na oyo etali malakisi oyo na—napesaka. Kasi nakolinga koloba boye, bandeko, ntango mosusu, soko olimboli yango lolenge oyo yo omonaka yango, ekoki kokesana na oyo ngai nandimaka. Kasi, nakozala na esengo ya koyoka oyo yo osengeli koloba.

4 Mpe Ezali ná likanisi yango nde nazali koteya Mateya oyo, uta na . . . Liloba na Nzambe, na motema na ngai. Ezali mpo na kolendisa Lingomba, mpo na Lingomba mobimba, Lingomba na mokili mobimba; Lingomba ya Klisto, na mokili mobimba. Mpe na bosolo, nandimaka mpenza ete tozali kobika na mokolo na nsuka. Mpe makasi nyonso nasalaka mpo na kolimbola oyo, kasi ata bongo namekaka te kosala yango, kondimisa yango na makasi, na lolenge moko to mosusu. Nakwéisámá ata moke te, na boyébi na ngai, ya kosala likambo wana.

5 Mbala mingi bato bayokaka ba-bande, mpe balobaka: “Ee, nandimaki likambo wana te. Ayebi na ye kaka malakisi na ye te,

ayebi Makomi te.” Ee, yango, yango ekoki kozala mpenza solo. Bomoni? Nakoloba te ete ezali solo te.

Kasi, mpo na ngai, na—nayékolaka Yango, kozua maloba moko—moko te. . . Natángaka oyo bato mosusu balobaka, mpe nasepelaka na bango. Nyonso oyo moto nyonso alobaka, nasepelaka na yango. Kasi, na nsima—na nsima namemaka yango liboso na Nzambe, mpe natikalaka ná yango kino nákoka kolimbola yango, longwa na Genese kino na Emoniseli, mpe na nsima komona yango nyonso kolandana mpenza ná Biblia. Na bongo, na—nayebaka ete ezali esika moko pene na solo. Mpe, na bosolo, epai yo olóngi, ezali kaka esika moko oyo nabimi na—na molongo. Mpe, ntango mosusu, esika yo okwei, to olóngi, esika yango nde nabimaki na molongo, ekozala yo tó ngai.

⁶ Boye, tosepelaka na bino nyonso bato malamumu oyo bozali awa, na liyangani, na ntongo oyo, mpe bino bato malamumu oyo boyokaka ba-bande oyo. Mpe biso. . . Nyonso oyo esálémi, ezali mpo na Bokonzi na Nzambe. Nazali na baninga malamumu mingi na mokili mobimba, oyo nasepelaka na bango mingi mpenza, mpe nandimaka ete nakolekisa Seko-na-Seko elongo ná bango. Mpe ezali na motema na ngai te komeka ko—kozimbisa bato yango, ata na ndenge moko te, kasi koluka nde kosala nyonso oyo nakoki kosala mpo na kosunga bango.

⁷ Namiyokaka lokola Salomo, ntango abondelaki, mpe alobaki, ete ápesa ye bwanya mpo ákoka kokamba libota na Nzambe. Oyo wana nde libondeli na ngai ya sembo.

⁸ Baoyo basalaka mosala elongo ná ngai awa, zinga-zinga, namoni Ndeko Mercier, mpe—mpe Ndeko Roy Borders, mpe Ndeko Neville, ná Billy Paul, mwana na ngai. Gene azali awa esika moko, mpe bandeko, Teddy, ná bamosusu. Nasepelaka na bato nyonso oyo bayaka kosunga ngai.

⁹ Nayebi lisusu awa, eleki ntango molai te, Ndeko Leo, e—emononeli oyo azuaki; abengaki yango ndóto, na mpokwa moko, ntango tokutanaki liboso; amonaki nsongé ya piramíde moko ya monene, mosika likoló na mopepe. Mpe nazalaki kuna likoló koteyáká, na esika moko boye, mpe amataki mpo ámona soko ezalaki nini. Ntango akómaki kuna likoló na nsongé yango, ee, alobaki, mosika kuna kati na pole moko lokóla palata, to lokóla ngómbá patátálú, nazalaki ya kotelema, koteyáká bato. Abendaki bokebi na ngai, mpe natalaki na nzingazinga na ye. Mpe alobaki: “Okomaki mpenza kuna ndenge nini? Ndenge nini nakoki kokóma kuna?”

¹⁰ Nalobaki: “Leo, moto moko te akoki koya awa. Nzambe nde asengeli komema moto awa. Sikawa, yo osengeli komata kino awa te. Osengeli kokita mpe kotatola na bato wana kuna na nsé, nsima na yo komona yango, ete ezali Solo, ete Yango ezali Solo.” Leo akitaki, mpo na kotatola na bato.

¹¹ Esili koleka ntango boni, Ndeko Leo? Mibu ebele, boye te? Mibu ebele. Kobanda wana, na boyebi na ngai, azali kosala likambo yango na bosembo mpenza, kotatoláká na bato ete lotómo yango euti na Nzambe. Sikawa, mpe na—nalingi te ete éuta na ngai. Soko euti na ngai, na bongo, ezali malamumu te, mpamba te malamumu moko te ezalaka kati na moto. Bomoni? Esengeli kouta na Nzambe.

¹² Sikawa, ntango natámbwisi miso. . . Lobi nsima ya nzánga, topesanaki mbote ya loboko ná moninga na ngai, Ndeko West. Namoni ye naino te, na kati ya losambo; iyo, namoni ye sikawa, na ntongo oyo. Boyebi ba-kilometre boni bato yango batambwisaka motuka, nzela molai longwa na—na Alabama, na mokolo ya Lomingo, mpo na kokóma awa, kolongwa kuna na Alabama!

¹³ Ndeko Welch Evans, nazangaki ye na Lomingo eleki. Moto moko alobaki ete azalaki awa lelo. Bango bakumbaka motuka kolongwa Tifton, na Georgia, mpo na kozala awa. Mpe ndeko oyo afandi awa, bazalaka elongo ná ye. Bazali mingi mpenza! Ndeko Palmer, auti na Macon, na Georgia. Mpe namoni, nandimi, Ndeko mwasi Ungren ná bamosusu kuna. Bango nyonso bauti mosika na Memphis, na Tennessee. Sikawa, bokanisi. . . Mpe bamosusu bauti na bisika mosusu. Nauti kokutana ná mwasi moko awa, auti kuna, mosika na Caroline ya Sudi.

¹⁴ Sikawa, bokanisi ete bato oyo awa. . . Nazalaki kotambwisa miso, bauti na Chicago, mpe na bisika ndenge na ndenge, kotambwisaka motuka ba-kilometre nkama na nkama, kaka mpo na kozala na losambo. Na nsima, ntango bakómi awa, esika ya kofanda ezali te. Climatiseur na ndako ezali te; bakotelema wana kati na ndako moko ya kala mpe molungé, kopangusáká motoki. Kolongola na mbongo ya bilei, ya bana na bango, mpo na koya awa koyoka Nsango yango. Bolingi koyebisa ngai ete, esika moko te ezali. . . na ngámbo ya ebale oyo, epai moko, ezali na esika moko oyo bakokende, moko na mikoló oyo? Ya solo, ezali mpenza. Yango nde bosembo! Bato yango bafutaka moko na zomi. Ezali kaka te ete bayáka, bamemaka moko na zomi mpe makabo na bango, bamemaka yango na ndako ya Nkolo, komeka kosala oyo ezali malamumu. Nzambe ápambola mingi mpenza bato ya sembo ya bongo! Tika ete mawa mpe ngolu na Nzambe ézala ná bango.

¹⁵ Namoni moninga na ngai, Charlie Cox, bango bauti na sudi ya Kentucky. Mpe bisika nyonso, soki otambwisi miso, okomona bato oyo bauti na bisika ndenge na ndenge.

¹⁶ Elenge mobali oyo afandi kuna, nabosani nkombo na ye. Nakutanaki na ye na Chicago. Kasi outi na eteyelo moko ya Biblia, mosika na awa, esika moko, boye te? [Ndeko yango alobi: “Springfield, na Missouri.”—Mok.] Springfield, na Missouri; eteyelo ya Biblia ya Assemblée de Dieu. Iyo. Malamumu, malamumu

mingi. Bomoni, bautaka mpenza longwa na bisika nyonso, na mwa losambo moke oyo.

¹⁷ Bókanisa naino, eleki pene na mibu ntuku misato, ntango natiáki libanga ya litúmu, na ntongo wana, Natelemaki kuna, na Balabala ya Nsambo, na ntaká ya matakanelo moko. Nabalaki ata naino te, obele elenge mobali. Namonaki emononeli moko, bato bakangami mpe batondi awa, kouta na bisika nyonso. Nazalaki na esengo mingi, natelemaki nsima ya eteyelo. Na ntango yango nde Ayebisaki ngai: “Kasi oyo ezali tabernacle na yo te.” Mpe Afandisaki ngai na nsé na mapata. Mpe boyebi ndenge lisolo yango esukaki, ekomami na lokasa ya Biblia oyo ezali na kati ya libanga ya litúmu kuna.

¹⁸ Nazongisaka matondi mingi mpo na bino. Nakoki te... Yango, ezali mpenza moke, mpo na ko—koloba bobele: “Ee, nazongisaka matondi mpo na bino.” Kasi nabondelaka mpo na bino. Nandimaka bino. Nandimaka makambo na Nzambe oyo bobikelaka. Nandimi te ete mobali to mwasi moko akotambola na motuka ba-kilometre nkama na nkama koya awa, mpo na kotalisa lolenge ya bilamba oyo balati. Na—nandimi te ete bakosala yango. Te. Bakolinga koya awa te kaka mpo bámona bango. Bazoya awa ezali mpo bazali na mposa makasi mpe bosembo mpenza mpo na lobiko ya milimo na bango. Libondeli na ngai ezali: “Nzambe sunga ngai, sunga ngai názala ata na ndambo ya bosembo wana, mpo námeke koteya bango ná nyonso oyo ezali na motema na ngai, wana nazali kotálela Nzambe.”

¹⁹ Liteya, bomoni, na ntongo oyo, eyemami awa na etánda, awa. Ezali kaka mpo na kosala ete, mpo na kolimbola, wana nakozala kokóba, komeka kosala ete bókoka kososola likambo oyo nazali komeka kolobela.

²⁰ Mpe *Mpóso Ntuku Nsambo Ya Danyele* oyo, ezali boyekoli moko monene, pene na mikolo mibale mpe butu mibale, nazalaki, na nsuka ya mpóso awa, nazalaki koyekola yango, komeka kozua maloba nini ya koloba mpo na Solo. Esengeli kolóngobana na Biblia mobimba. Bomoni? Okoki kaka te kozua Yango, kaka mwa Likomi moko, mpe komisalela li—lisósolu moko, na nsima koloba: “Ee, oyo nde oyo elobi,” bongo obaluki mpe olobi: “Boye, kasi awa E—Elobi eloko mosusu, ezótélemela oyo.” Ekoki kosala yango te. Esengeli koloba eloko yango moko ntango nyonso. Soko osali bongo te, na boye, yango, na bongo ozali—ozali na libunga. Ezali lolenge wana nde namekaka kolakisa Yango.

²¹ Kútu, na ba-bande, lokola ezali kotiama na ba-bande, botóngi ya monene koleka oyo nazuaka mpo na ba-bande, kouta na bandeko na ngai na bisika ndenge na ndenge na mokili, ezalaka kondima ngolu na Nzambe, ete ngai nalakisaka, ndenge nasalaka, ete: “Tobongisámá liboso na ebandeli ya mokili.”

²² Bandeko na ngai ba-Pantekotiste, ya solo, nayebi ete bomonaka makambo lokola bato ya mibeko, bomoni, mpe na—nayebi ete etungisaka mwa moke ndenge na bino ya komonela makambo. Kasi okolinga, lokola ndeko Moklisto, okolinga komipesa likambo yango mwa likanisi mpe kofukana na mabolongo na yo liboso na Nzambe, ná Biblia na yo, mpe kosenga na Nzambe ete álimbolela yo yango? Okolinga kosala yango? Okolinga kozua lolenge ya komona mibeko mpe komeka kokonanisa yango kobanda na Genese kino na Emoniseli?

²³ Mpe, “Momboto na nyoka,” yango nde likambo ya makasi koleka; bato mingi bandimaka yango te. Kasi, soko botángi kaka na Genese, Biblia elobi ete nyoka azalaki na momboto. “Mpe Nakotia koyinana katikati na momboto na nyoka ná Momboto na mwasi.” Boye, nyoka azalaki na momboto. Mpe, soko momboto na nyoka ezalaki ya molimo, na boye Yesu azalaki moto te, boye, Momboto ya mwasi ezalaki ya molimo. Bango mibale bazalaki na mimboto, mpe bonguna yango ezali kaka wana. Nyoka azalaki na momboto. Mpe, soko okoki bobele kozua Biblia na yo, mpe kobeleva liboso na Nzambe na limemia nyonso mpenza, nandimi ete Nzambe akomonisa yo yango.

²⁴ Mpe soko osósoli yango te, nazali—nazali wana, ntango nyonso, mpo na kosala nyonso oyo ekoki mpo na kosunga yo, na nzela ya mokanda to na nzela ya—to na nzela na lisolo ya yo ná ngai moko, to nyonso oyo nakoki kosala mpo na kosunga yo. Na bosolo, toyebi ete likambo yango ebikisaka moto te, ekweisaka mpe moto te, kasi ememaka kaka Pole likoló na likambo oyo tozali biso nyonso komeka na makasi mpenza kosala ete bato bámona. Bomoni? Ememaka kaka Pole.

²⁵ Sikawa, mpo na bino na losambo awa, nalobi yango mpo na ba-bande, bomoni, mpo ba-bande oyo ekendeke bipai nyonso.

²⁶ Sikawa tógumba mitó mwa moke, liboso tóbelema na Mokomi ya Liloba oyo. Bato boni na losambo na ntongo oyo, bazali na bosenga, bóloba kaka: “Nazali na bosenga. E Nzambe, yokela ngai mawa”? Nkolo ápambola yo. Mpe na baoyo bakoyoka bande yango, ntango bokoyoka yango, tika ete Nzambe ákokisa bosenga na bino.

²⁷ Tata na biso na Likoló, tozali bato oyo bazali kozongisa matondi, atako tozali bato oyo balóngobani te. Kasi tozali kobeleva na Ngbende na Yo ya ngolu na ntongo oyo, mpo tobengami ete tóya. Yesu alobaki: “Bósenga nyonso na Tata na Nkombo na Ngai, nakosala yango.” Sikawa, toyebi ete wana ezali solo.

²⁸ Mpe awa kati na losambo, mpe kuna libanda na—na mikili epai ba-bande ekokende, ntango mosusu Baklisto bankóto zómi na zomi, baoyo babótámá mbala ya mibale, bakoyoka yango. Mpe toyebi, Tata, ete ntango tobótami mbala ya mibale, molimo na biso ebotami uta na Likoló. Ezali Molimo na Nzambe,

Molimo Mosanto, likoló na biso. Mpe toyebi ete Molimo Mosanto yango ezali na nguya nyonso, mpe ekoki kosalela biso nyonso oyo tolingi ete ésalema. Na bongo, Tata na Likoló, tosengi ete Ókangola kondima na biso na Molimo yango, mpo Ézala na makoki ya kokokisela biso na ntongo oyo, mpe mpo na nkembo ya Bokonzi na Nzambe, bosenga mpe mposa nyonso oyo, mpo tókoka kobikisama na makono na biso mpe minioko na biso, mpo tókoka kosalela Nzambe na biso na nyonso oyo ezali kati na biso.

²⁹ Fungólá matoi na biso ya lisosoli lelo, mpe wana ezali ngai kosala makasi mpo na kolobela likambo monene oyo, mpe kokómisa yango polele na makanisi ya bato. Sikawa, nasili kokoma yango awa, Nkolo, na lokasa, mpe esili koyemama na étánda ya moindo oyo, liyemi yango, kasi nazali na makoki ata moke te ya kolimbola yango. Sikawa tobeleli na Yo, Molakisi monene Oyo akomaki Liloba, Oyo apémélaki Yango, Oyo apesaki Yango na mosakoli Danyele. Mpe tobondeli ete Ótinda mpémélá na ntongo oyo, na mikolo ya nsuka oyo, lokola Alobaki ete Buku ekokangama kino na ntango oyo, ete Ófungola masosoli na biso. Tika ete kondima ya koyamba ézala na kati ya mitema na biso, oyo ekotika Liloba ésimbama makasi mpe ézua Bomoi, mpe ébota banzete ya boyengebene na bomoi na biso, oyo Yango esengeli kosala. Kondima na biso na Nzambe, tika ete ésalela yango mpo na biso na ntongo oyo. Mpo tozali sikawa kotalela na komikitisa, mpe na komíbonza epai na Yo, na Nkombo na Yesu Klisto. Amen.

³⁰ Sikawa, tozali kozongisa matondi mpo na ntongo oyo, mpo na libaku malamumu lisusu, ya kofungola nkasa oyo ya Liloba na Nzambe ya Seko.

³¹ Sikawa, ntina oyo namipesaki meko ya komeka kolimbola likambo oyo, ezali mpo tozali koyekola Buku ya Emoniseli, mpe touti koyekola bileko nsambo ya lingomba. Mpe, bongo, na nsuka ya mokapo ya 3 ya Buku ya Emoniseli, Lingomba enétolami longwa na mabelé, kino na Nkembo. Mpe nazali komeka, na motema na ngai mobimba, kopesa yango na bato, mpo bazali kozela ete eloko moko ésalema, eloko oyo bamoni ete ekomami na Buku ya Emoniseli, na ntango oyo etalaki eleko ya lingomba te. Mpe tokómi pene na nsuka koleka ndenge bozali kokanisa.

³² Mwa butu eleki, Billy, na ngai. . . To, mwasi ya mwana na ngai, nde, abengaki ngai, na kati ya butu mpenza, mpe alobaki ete mobali moko na nkombo Andy Herman, oyo azali mwana ya nókó na ngai, alálaki wana, kobundáká na liwa na lopitalo. Nakendeki kotala ye. Bapesaki ye nkisi ya kolembisa nzoto, na . . . mingi mpenza, na lolenge ete alálaki, mpe nakokaki kosolola na ye te. Na ntongo elandaki . . . Nasengaki na Nzambe ete ábatela ye na bomoi kino nakokoka kosolola na ye. Andy azali moto malamumu, kasi azalaki na ye Moklisto te. Azali nókó te; azali nde cousin, abálá cousine na ngai.

Mpe ntango Tata-mwasi Ade ayebisaki ngai, atelemaki wana, alobaki: “Billy, mibu ntuku mwambe nyonso oyo ya bomoi na ye, asaleli Nzambe te. Kasi,” alobaki, “eleki ba-mpóso mike, afandaki na ndako. . .” Ye, ná mibu ntuku mwambe, solo mpenza, asálaka misala ya maboko mingi te. Kasi alobaki. . .

Abengaki ye mpe alobaki: “Ade, oyebi nini? Klisto ayaki liboso na ngai awa, eleki kaka miníti moke.”

Atalaki ye, alobaki: “Andy, ozali—ozali. . . Likambo yango nini?” Alobaki. . .

Andy alobaki: “Te. Atelemaki mpenza awa liboso na ngai, mpe Alobaki likambo moko.”

Nalobaki: “Alobaki nini?”

“Ntango ekómi mosika, koleka ndenge ozokanisa.”

³³ Mwa bampóso kobanda wana, mpóso mibale to misato, akomaki ekátatali mpe alalaki paralizé kuna na lopitalo, azalaki kobundáká na liwa. Nalobaki: “Tata mwasi Ade, nsoni na yo mpo obengaki ngai to moto mosusu te, mpo na kobongisa motema na ye mpo na ngonga oyo akómi na yango sikawa.”

³⁴ Nasengaki na Nkolo, ntongo elandaki, ntango na. . . Akokaki koloba te, boye, natunaki ye kaka. Nalobaki: “Okoki koyoka ngai, Nókó Andy?” Mpe a—akokaki koningisa motó mwa moke mpe koningisa mbanga na ye. Nabondelaki mpo na ye, nasalaki ete áyámbola masumu na ye liboso na Nzambe. Nalingaki kobatisa ye, mpe Tata mwasi Ade andimaki kobatisama.

³⁵ Mpe nakitaki na elekelo, mpo na kotala elenge mwasi moko, oyo afandaka na zingzinga awa, oyo basengelaki kotinda ye na lopitalo ya bato ya magbóma, kasi Nkolo asálaki mpo na ye likambo moko ya monene, azongaki na ndako.

Bongo, na nzela, nakutanaki na ndeko mwasi moko ya moíndo, mpe alobaki: “Yo nde Ndeko Branham te?”

Nalobaki: “Ezali ngai.”

Alobaki: “Ozali koyeba ngai lisusu? Ngai nazali Mrs. Drye.”

³⁶ Mpe nalobaki: “Iyo, nandimi ete nazoyeba yo lisusu. Pete Drye ná bamosusu.” Nalobaki: “Iyo, na—nazoyeba yo lisusu.” Atalaki na eteni ya ndako, mpe wana etálaki biso. . . Namitunaki mpo na nini alobaki bongo. Mpe, kuna, Nókó Andy atelemaki na mbéto, afandaki, mpe azalaki koningisa matandu ná maboko na ye, lokola moto nyonso, komeka kosimba eloko moko, eloko oyo ekitisaka mbeto, mpo ákoka kobima wana mpe kokende na ye. Sikawa, bazoya kozua libatisi na Nkombo ya Nkolo Yesu, ye ná mwasi na ye.

³⁷ Boye, ntina oyo nalobi likambo yango, ezali ete ntango ekómi mosika koleka oyo tozokanisa. Mpe nandimi ete *Mpóso Ntuku nsambo ya Danyele* oyo ekosala ete tósosola yango.

³⁸ Sikawa, mingi ya bandeko na biso ba Pantekotiste, baoyo nalobelaki liboso na bande, ete bandimaka na bango likambo Oyo te. Bazoluka ete likambo moko ya monene, ya nguya ésalema. Mpe, bandeko na ngai, soko bokoki koyoka malamumu mpenza, kasi te. . . mpe boyoki, bokomona ete eloko moko ya monene, ya nguya wana esili koleka. Yesu abelemi mpo na kozonga.

³⁹ Lingomba ekei na mokapo ya 3 ya Emoniseli. Eloko ata moko te elobamaki kuna na ntina na eloko moko te, kasi likambo ya nsuka mpenza ezalaki motindami ya nsuka ya eleko. Na nsima, tokolobela likambo ya Bayuda kino na bozongi lisusu elongo ná Mwasi na libala, na mokapo ya 19. kobanda mokapo ya 6 kino mokapo ya 19, nyonso ezali Bayuda.

Yango nde esika nalingi kokóma ná ndeko na ngai malamumu oyo, ntango tokomona Bilembo wana, Ndeko Wood, azalaki liboso Temoin de Jehovah, ye ná libota na ye mobimba, azali awa na ntongo oyo, ete “nkoto mokama na ntuku minei na minei” wana bazalaki, bazalaki na eloko moko ya kosala ná Mabota te. Bazali Bayuda. Bomoni? Mpe ezali te Nzoto ya Klisto oyo emonanaka te na mokili lelo.

Mwasi na libala azali Nzoto wana oyo emonanaka te. Na nzela na Molimo Mosanto tobatisami na kati ya Nzoto oyo emonanaka te.

⁴⁰ Sikawa, toyebi yango na Buku ya Danyele awa, esika tozalaki kotánga, tokotánga yango lisusu mpo ezali Liloba na Ye. Na mokapo ya 9 ya Danyele, molongo ya 24.

Mpóso ntuku nsambo ekatami mpo na libota na yo mpe mpo na engumba mosantu na yo, mpo na kosukisa ekweli. . . mpo na kosilisa lisumu, mpo na kolongola lisumu na nko, mpo na kokótisa boyengebene ya lobiko na lobiko, mpo na kokanga emononeli mpe lisakoli na elembo mpe kopakola esika eleki Bulee.

Molongo ya 25: “Yango wana yeba mpe sósola, ete uta. . .” Sikawa, yango nde tozalaki kolobela, mpe tosukaki wana mokolo ya Lomongo eleki na mpokwa, “kopakola esika eleki Bulee.” Awa nde tokobanda na ntongo oyo, na molongo ya 25. “Yango wana. . .”

Yango wana yeba mpe sosola, ete longwa na kobima na liloba mpo na kotemisa mpe na kotonga lisusu Yelusaleme (elingi koloba “engumba mosantu na yo,” bomoni) kino. . . Mokonzi Masiya, ekozala mpóso nsambo, mpe mpóso ntuku motoba na mibale, balabala ekotongama lisusu, mpe bitutu, nde na ntango na mpasi.

Mpe na nsima na mpóso ntuku motoba na mibale, Masiya akolongolama, kasi mpo na ye moko te, Libota na mokonzi oyo akoya likobebisa engumba mpe esika ya

bulee; nde nsuka na ye ekoya lokola na mpela monene, libebi likatami kino na nsuka ya etumba.

“Mpe . . .” Sikawa, bómikanisela, oyo wana nde nsuka ya etumba. Toyemi yango na etanda awa. “Mpe,” sikawa tobandi likambo mosusu.

Mpe akojalisa kondimana makasi na bato mingi mpo na mpóso moko, mpe na katikati na mpóso yango, akosukisa mbeka mpe mobomá, mpe moto na kobebisa akokoma ma mapapu na makambo na mbindo, kino na nsuka, (elingi koloba, nyonso), mpe oyo ekanamaki ekosopama likolo na mobebisi.

⁴¹ Oh, liteya nini oyo! Nalobaki na mwasi na ngai mokolo mosusu yango: “Nazomituna soko bato bazali kosósola mpenza yango.” Sikawa, nalingi ete bósosola yango. Te . . . Soko bo, tosendeli kotikala awa mokolo mobimba, tótikala kaka. Sikawa, to—to—tolingi kososola yango. Bomoni? To—to—tolingi koyeba ete ezali Solo. Mpe, bino, soko bokoki mpenza komona yango! Nakosenga, ntango mosusu . . .

⁴² Bongo, na nsima, nakotika liyemi yango awa, mpe bino—bino bokoki koyema yango, na nsima. Bóya awa nsima na nzanga oyo, na ntango nyonso oyo bolingi, mpo na koyema bilílí yango mpe nyonso wana. Ekosunga bino mpo na kososola. Yango wana natii yango wana, mpo bósosola yango.

⁴³ Sikawa, tózongela yango mwa moke, mpo tókoka kozua mobóko. Sikawa ezalaki na . . . Danyele azalaki komitungisa mpo na libota na ye, mpo atángaki mosakoli Yilimia, mpe asosolaki ete Yilimia alobáká ete bakozala na boombo mibu ntuku nsambo. Na bongo, amonaki ete basilaki kozala na boombo mibu ntuku motoba na mwambe, boye ayebaki ete ntango ekómaki pene. Boye, atiaki mpembeni misala na ye nyonso, akitisaki, ndenge ezalaki, bipekiseli ya misala na ye nyonso ya mokolo na mokolo. Abongolaki elongi epai an Nzambe, alataki ngóto na mputulú, mpe abandaki kokila mpe kosondela, mpo ákoka kososola ntango nini ngonga yango ekoya. Na nsima, tomoni, lokola nalobaki liboso . . .

(Okoki kobalola yango, na ngámbo wana, mwa moke kaka?) Pakapáka, ezali mwa makasi koleka. Ebebisaka mongongo na ngai. Na bongo . . . (Matondi, ndeko.)

⁴⁴ Sikawa, awa tomoni ete, Danyele, alingaki koyeba likambo oyo mpo na libota na ye. Mpe nakanisi, soko Danyele, wana azalaki kotánga basakoli liboso na ye, mpe azalaki na lolenge ya lisosoli oyo, ete azalaki pene na nsuka, mpe alukaki Nzambe, mpo na koyeba boni nsuka ebelemaki, boye nakanisi ete biso tosili kolongisama, na komona ete tozali na nsuka ya nzela sikawa, mpo na koláta ngóto ná putulú te, kasi tóbwaka makambo ya mokili, mpe mitungisi ya bomoi oyo, mpe tóluka Nzambe, mpo na koyeba mokolo nini ya mbula tozali kati na

yango, mpamba te tomoni ete tokómi na nsuka, mpe tika ete Lingomba ékila mpe ébondela mpe émilengela. Yango wana nasali molende ya komipesa mokumba. . . Koyebáká mpenza te lolenge ya kolimbola likambo oyo, mpo nazalaki kozunguluka yango ntango nyonso, mpe nalobaki “Mpóso ntuku nsambo ya Danyelee wana,” mpo nazalaki kokoka kosósola yango te. Mpe yango nde ntina oyo namipesi mokumba yango sikawa, ya komeka kolimbola yango. Mpe nandimi ete, na lisungi ya Nkolo, nakoki kosala yango na ngolu na Ye, ya komema yango na esika oyo, kotalisa bino ndenge tokómi pene na Boyei ya Nkolo.

⁴⁵ Sikoyo, Danyelee, etikalaki kaka mibu mibale. Bongo, tomoni ete, wana azalaki na kati ya mabondeli, Mwanje, Gabriele, ayaki mbangu epai na ye; mpe alimbwelaki ye kaka te ntango oyo libota na ye elingaki kobima na boómbo, kasi, lisusu, nyonso oyo ekánamaki mpo na libota na ye, nyonso oyo etikalaki, mpo na libota na ye. Alobaki: “Etikali mpóso ntuku nsambo mpo na Bayuda.”

⁴⁶ Na bongo, tomoni, ete Azalaki na ntina motoba. Moko na yango ezalaki, kosukisa mabe; mpe—mpe kosilisa lisumu; kolongola lisumu ya nko; kokotisa boyengebene ya seko; kokanga emoneli na elemba mpe lisakoli; mpe kopakola esika eleki Bulee.

⁴⁷ Mpe tozuaki, Lomongo loleki na ntongo, Danyelee ná lolenge azalaki kuna, kobondeláká. Na mpokwa ya Lomongo eleki, topesaki Makomi, mpo bato bátánga yango ntango bakokóma na ndako. Botángaki yango? Bosepelaki na yango? Kitoko mingi!

⁴⁸ Sikawa, ntina motoba. Mpe tomoni ete, na ntina ya motoba oyo, “kopakola esika eleki Bulee,” tomoni ete “Esika eleki bule” etalisaka ntango nyonso Lingomba, Mongombo. Mpe likambo ya nsuka oyo esengelaki kosalema ezalaki, kopakola Esika eleki bule, ezali Mongombo ya Mbula nkóto, oyo Ye akofanda na kati ntango ya Mbula nkóto, oyo tokofanda na kati.

⁴⁹ Sikawa, lelo, sikawa tozali kobanda: “Mpóso ntuku nsambo ezali nini?” Mpe oyo ezali eteni ya motuya monene mpenza, mpóso ntuku nsambo.

⁵⁰ Sikawa, toyebi ete Makomi ekoki kokosa te. Esengeli kozala Solo. Mpe soko Mwanje oyo, Gabriele, ayaki koyebisa Danyelee ete etikali kaka mpóso ntuku nsambo mpo na Bayuda. . . Sikawa, biso tokoki kokokanisa yango na mikolo motoba. . . to mpóso ya mikolo nsambo. Kasi, na lisakoli epesamaka ntango nyonso na masese.

⁵¹ Na boye, na ntembe te kati na bileko, ezalaki na bato nkama na nkama, bato ya mayele mingi, bato na makoki mpenza, baoyo bamekaki kolimbola nini mpóso ntuku nsambo oyo ezalaki. Mpe natangá mingi ya ba-ndimbola na bango na ntina na yango. Mpe napesi matondi mingi na Mr. Smith, ya lingomba Adventiste, mpo na makanisi na ye. Napesi matondi mingi na Dr. Larkin,

na makanisi na ye. Napesi matondi mingi na bato ya mayele nyonso oyo, mpo na makanisi na bango na likambo oyo. Mpe na kotángaká bango, epesi ngai pole mingi, ete nakoki kozua bisika oyo emonani malamu. Kasi mpo na kozua likanisi oyo na—nakanisaki ete nakolinga kolimbola, Nalukaki-lukaki na encyclopedie ya “ntango,” mpo na koyeba nini “ntango” elingaki koloba.

⁵² Mpe tomoni awa, tozali na “ntango, ntango, mpe ndambo ya ntango.” *Ntango* ezali nini? *Mpóso* ezali nini? Sikawa, oyo wana esalemaki eleki mibu nkóto misato, nkama minei na ntuku misato, uta ntango oyo, utá Nzambe abandaki kosala ná Bayuda; eleki mibu ebele, ebele. Danyele azalaki L.K., mpe ntango yango ezalaki L.K. 538, mibu 538 liboso na Klisto, ntango alobaki likambo oyo mpo na “ntango, ntango, mpe ndambo ya ntango.” Mpe, mpóso ntuku nsambo, bótala esika mpóso ntuku nsambo elingaki komema ye. Na boye, azalaki naino na Babele, na mpóso ntuku nsambo, nzokande Nzambe ayebisaki ye ete ezalaki yango nde ntango oyo ekatamaki mpo na libota na ye.

⁵³ Sikawa, losambo na ngai awa eyebi ete na mibu nyonso oyo, nayeabisaka bino ntango nyonso ete: “Soko bolingi koyeba mokolo oyo tokómi na kati ya mpóso, bótala manáka. Kasi soko bolingi koyeba ntango oyo tozali kobika na yango, bótala Bayuda wana.” Yango nde sáa kaka moko. Nzambe akataki nta—ntango moko te mpo na bato ya Mabota; ntaká ya ntango moko boye ekatamaki te. Mpe ezali esika wana nde nakanisi ete bakomi mingi ya minene babulunganisaki yango, mpe bamekaki kokómisa yango likambo ya Bayúda ná bato ya Mabota, mpo Alobaki: “Libota na yo.” Kasi Azalaki koloba na Danyele, na Lingomba te; na libota ya Danyele, Bayuda. Soki Azalaki koloba na Lingomba, elingaki kolongobana esika moko te; o—ozongi mosika mpenza na nsima, liboso kutu ya boyei ya Klisto. Elingaki na yango koleka ata bolingaki kotia yango na ba—mpóso ya ndenge nyonso ya lisakoli. Elingaki na yango koleka. Kasi Azalaki koloba na Bayuda, boye na yango, Bayuda bazali sáa ya Nzambe.

⁵⁴ Boyebi lisusu awa, kala mingi te, ntango Ndeko Arganbright, ya California, vice-president ya Association Internationale ya Ba-hommes d’Affaires du Plein Evangile, ayaki na ndako na ngai mpe amemaki ba—bande moko; bande te, kasi filme moko—moko, oyo ba . . . ya *Miníti Misato Liboso Ya Minuit*. Esalemaki na nzela ya boluki-luki ya zébi. Ntango namonaki Bayuda wana kozonga, kozonga na Yelusaleme, nayaki awa na tabernacle, mpe nalobaki: “Namiyoki lokola nabongoli motema lisusu.” Mingi na bino bozomíkanisela likambo yango. Nalobaki: “Komona Bayuda wana kozonga!”

Yesu alobaki, na Matai, mokapo ya 24: “Ntango bokomona nzete ya mosuké kobimisa nkasá na yango.” Boyebi likambo nini bosengeli kotalela, bomoni, Bayuda bazali kozonga!

⁵⁵ Sikawa, nazali na mwa maloba oyo nakomaki awa. Nakosepela kolobela yango. Sikawa, sikawa, nako—nakozua ntango na ngai, mpo bókoka mpe kokoma yango. Sikawa, nyonso oyo esalemi, oyo...Sikawa, biso...Na eleko ya ntango oyo tozali na yango sikawa, makambo nyonso oyo ezosalema na... Ezali Bayuda; etali Lingomba na eloko ata moko te. Nyonso oyo esalemi banda na Emoniseli mokapo ya 3, kino na mokapo ya 19, etali Lingomba na eloko ata moko te. Bokoki kobimisa na yango eloko moko te. Ezali na yango kuna te.

⁵⁶ Sikawa nalingi kolimbola lolenge nini namonaki likambo oyo. Sikawa, na etánda, mingi na bino bokomona ete nasili koyema, ntáká ya bantango, ndenge elandani na etando, na lolenge ete moto nyonso ákoka kososola. Bokoki...Bozokoka komona yango te, kuna na nsima, nabanzi, ekomami na nkómá mike mingi. Mpe ezali nkómá ya Becky. Nakanisaki...Mpe, liyemi yango, nasalaki moko na yango ya mabe koleka wana. Kasi, Becky moto ayemaki oyo wana, uta na elílingí ya ndoto ya Nebukadanesala. Becky, nakanisi ete ezali komonana mingi lokola mwasi koleka lokola mobali. Kasi, ata bongo, eko—ekopesa biso boyebisi, oyo tosendeli na yango.

⁵⁷ Sikawa, soki totángi na Biblia ete mpóso ntuku nsambo ekatami mpo na libota, sikawa, ba...etali Lingomba na eloko moko te. Mpóso ntuku nsambo yango etali Lingomba na eloko moko te. Soki botali malamau awa, na liyemi yango, natii eleko ya lingomba katikati ya mpóso ntuku nsambo yango.

⁵⁸ Totii yango awa. Ndeko moko na Georgia ayemelaki biso yango awa, ntango tozalaki koyekola bileko ya lingomba. Mpe tondimisami ete tokoki kososola ntina na likambo oyo. Mpembe oyo na kati ya lingomba awa, elingi koloba ete ezalaki nyonso ya bantómá. Na nsima, na eleko ya lingomba ya mibale, bazalaki na mateyo ya Banikolaiti, to, bazalaki na misala ya Banikolaiti; ekómaki naino mateyo te. Na eleko ya lingomba ya misato, ekómaki mateyo. Na eleko ya lingomba ya minei, ekomaki ebongiseli, mpe ekómaki bopápa ya Roma. Na—na eleko ya lingomba ya minei, ezalaki bileko ya molili.

Soko botali malamau, molili nyonso oyo ezali kuna ezotalisa Bonikolaíti, to Boroma. Eteni ya mpembe ezali kotalisa Molimo Mosanto, Lingomba. Mpe, ndenge ebandaki na eleko ya Santu Paulo, Lingomba mobimba ya bantóma etondaki na Molimo Mosanto. Na nsima, bato ya lokúmu babandaki kokota. Na nsima bamikembisaki mpe basálaki lingomba mobimba ya sika, uta na yango. Mpe mwa lingomba moke wana etumbamaki, mpe ebétámaki mabanga, eliamaki na ba-nkosi, mpe nyonso wana.

⁵⁹ Na eleko ya Reformation Luther ayaki, pole moke koleka, bomoni. Na mikolo ya Wesley, ememaki lisusu mwa pole koleka. Kasi na eleko ya lingomba ya nsuka awa, eleko ya lingomba ya Banikolaíti, yango nde eleko oyo biso to...Banikolaíti te,

kasi Laodikia, yango nde eleko oyo tozali kobika kati na yango. Bótala malamumu, Pole ezali mingi mpenza te.

⁶⁰ Moto moko, ntango amonaki liyemi yango kuna, alobaki: “Nsoni na yo, Ndeko Branham! Eleko monene oyo ya pole!”

Nalobaki: “Nakobanza bongo, soko etalami malamumu, yango ezotalisa kutu likambo yango nyonso te, soko ozui baoyo bazali mpenza peto na motema, baoyo babótámá mbala mibale na Molimo.” Bómikanisela, ezali eleko ya lingomba bobele moko, oyo Klisto atiami libanda ya lingomba na Ye Moko, na yango nyonso. Tolobaka-lobaka mingi, kasi: “Tozalaka na yango mpenza?” yango nde likambo oyo tozolobela. Klisto azali mpenza na kati ya lingomba? Ekozala mpenza na bato moke.

⁶¹ Sikawa, sikawa tókota na bozindó ya mpóso ntuku nsambo ya Danyele. Sikawa nakoki kozongela koloba awa lisusu; batei ya Nsango-malamumu, soki bondimi te likambo oyo, likambo te. Ekabwani na bileko misato, lokola tomoni na Danyele 9. Bileko misato. Ya liboso, eleko ya mpóso nsambo; nsima, eleko ya ntuku mibale mbala misato mpe mibale, elingi koloba ntuku motoba na mibale; na nsima eleko ya mpóso moko. Ekabwani na bileko misato ekeseni.

⁶² Sikawa, nakaboli yango awa na etánda. Eleko ya liboso; eleko ya mibale; mpe na lisosoli na ngai, na nzela na Nsango-malamumu, na nzela na Molimo Mosanto, ete, na ntango ya nsuka, Nzambe azongi lisusu epai na Bayuda.

⁶³ Sikawa, toyebi, na nzela na ba-Nsango-malamumu nyonso, ete Paulo alakisaki, ná basusu, ete Nzambe akozonga lisusu epai na Bayuda. Malamumu, na bongo, soki Akozonga lisusu epai na Bayuda, ndenge nini tokoki kotia likambo yango na ntango ya Danyele? Tosengeli kotia yango na eleko oyo ya nsuka. Ekosalema nsima na Lingomba ya Mabota kokende, mpamba te Asálaka ná Yisraele lokola ekólo, ná biso lokola moto na moto.

⁶⁴ Sikawa, nakomaki mwa makambo awa, oyo nakosepela kotángela bino wana tozali kokóba. Sikawa:

. . . *kobima ya liloba ya kotonga* lisusu *Yelusaleme* . . .

Yango, ezalaki na mokolo mwa 14 na sanza ya Misato. Soko moko kati na bino alingi kokoma yango, na Kiebéle, bokomona ete babéngaka yango *N-i-s-a-n*, *Nisan*, elingi koloba “sanza ya Misato.” Etinda epesamaki na mokolo mwa 14 ya sanza ya Misato, na mobu L.K. 445, etinda ebimaki mpo na kotonga, kozongela kotonga tempelo. Bososoli yango, lokola bouti kotánga Makomi. Kino esilaki, ezuaki mibu ntuku minei na libwa mpo na kosilisa tempelo mpe engumba, kotonga yango lisusu. Mpe, ndenge Biblia elobaki awa, Danyele moto azali koloba, to Mwanje, azali koloba na Daniele, ete:

. . . bitutú, mpe ekotongama *na ba-ntango* ya mpasi.

Mpe mingi kati na biso tozomikanisela, ntango etongamáki, basimbaki mbeli ya motongi-ndako na loboko moko mpe mopanga na mosusu, mpo na kosézela mongúna. “Mpe ekotongama na ba-ntango ya mpasi.”

⁶⁵ Boye, awa nde esika namoni likambo yango, wana nazalaki kozua mikolo na ngai. Sikawa, tozalaka na manáka mibale, misato ekeseni. Soki tozongi na manáka ya bonganga minzoto ya kala, tomoni ete, na manáka ya Julian, mikolo ezalaka nkama misato na ntuku motoba na mitano mpe ndambo moko ya minei na mobu moko. Batángaka ntango na boleki ya Sáláde ná minzoto ndenge na ndenge, mpe bongo na bongo. Batángaki yango. Sikawa tomoni, na manáka ya Baroma oyo tosalelaka sikawa, ezalaka na mikolo nkama misato na ntuku motoba na mitano na mobu moko, na nzela na manáka. Kasi na manáka ya Boklisto, to ya lisakoli, tomoni ete ezalaka na mikolo nkama misato na ntuku motoba na mobu moko. Sikawa, bokoki komituna ndenge nini mobulu oyo ekoti.

⁶⁶ Sikawa, nakoki bobele koloba yango lokola maloba na ngai moko. Nandimi ete kalakala, liboso na kobebisama ya mpela monene, na mikolo ya Yobo, mpe bongo na bongo, bazalaki kotánga ntango na nzela na minzoto. Mpe tososoli, to kalakala liboso na ntango yango, ete mokili etelemaki sémba. Bongo, ntango moto asalaki lisumu, mokili ebalukaki, etengamaki mpe mpela eyaki, yango wana tozali na mabángá minene ya malili, mpe bongo na bongo, mpe likoló ná nsé ya mabelé etondi na mabánga ya malili. Toyebi yango. Mpe mabelé etelemá sémba te. Eténgámá. Eningisaki yango longwá na esika oyo bazalaki kotala sanzá ná minzoto, mpe etiamaki mabe na bongo. To—to, bakokaki lisusu kotánga ntango na nzela na yango te, mpo ekendéki mpembeni, eténgámáki. Yango wana, minzoto wana emonanaka na mbala moko te, mpamba te ezali—ezali libanda na molongo, kokokana na minzoto wana. Bososoli? Nandimaka ete ezali bongo.

⁶⁷ Efandi na lolenge wana. Mpe etalisaka bobele ete oyo ezali kaka eleko moko ya ntango. Bozomona te? Nzambe azalaka na makambo na ndenge ya mobulu te. Atikaka yango kotambola ndenge wana mpo na ntango moke. Mpe ngai nandimi mpenza ete likambo yango nde esalemaki.

Mpe, ezali na ntango ya nsuka oyo nde Nzambe akomonisa ba-sekele yango na Lingomba. Asalá yango liboso te. Mpe ntina oyo Asalaki yango te, ezali mpo Lingomba ékoba kosézela mpe kobondela ntango nyonso, kozanga koyeba ntango nini likambo yango ekokóma. Kasi bómikanisela, na Danye 12, Alobaki: “Moto na bwanya akosola na nsuka, na ntango oyo ya suka.” Bomoni? Esili kopesamela ye.

⁶⁸ Molimo ya bwanya eyei na kati ya Lingomba, mpo na kotalisa na Lingomba, na nzela ya emoniseli ya Molimo Mosanto,

komema Lingomba na kati mpe komonisa mokolo nini oyo tozali kobika kati na yango. Kaka ndenge Gabriele ayaki epai ya—ya Danyelee, Molimo Mosanto ayei na Lingomba na mikolo ya nsuka, mpo na komonisa makambo minene oyo, ya bozindó, ya sekele. Bososoli sikoyo?

⁶⁹ Sikawa, yango nde ekokweisa mobu wana ya bonganga minzoto, to mobu ya Julian, manáka, bomoni, mobu ya lisanga ya ba-maçon, mpo mokili eténgámá. Bisó nyonso toyebi yango, toyekolaki yango na kelasi. Ezali libanda na molongó, yango wana, minzoto yango elekaka te na molongo ná mabelé na ngonga moko. Yango wana, manáka ya Baroma, yango mpe, ezali na libunga, mpo okoki kosangisa mikolo te. Makambo ezali mingi mpenza, oyo nakoki koloba awa. Oyo tomoni ete, ata ezalisami yango moko, ezali kolakisa biso ete mikolo ezalaka bobele ntuku misato, mpenza, na mobu moko.

⁷⁰ Sikawa, tózua Emoniseli, epai tosengeli kokende, awa, na ntango ya basakoli mibale. Biblia elobi: “Basakolaki mikolo nkóto na nkama mibale na ntuku motoba.” Sikawa, soko bozui manáka ya bonganga minzoto, ya solo, ekozala mosika koleka mibu misato na ndambo. Mpe soko bozui manáka ya Baroma oyo tozali na yango lelo, ekozanga mosika. Kasi soki bozui manáka ya lisakoli, mpe mikolo yango ezali mpenza nkóto na nkama mibale na ntuku motoba, na mikolo ntuku misato na sanza. Bomoni?

⁷¹ Tozalaka na mikolo ntuku misato na basanza mosusu, ntuku misato na moko na oyo elandi, ntuku mibale na mwambe na mosusu. Bomoni, tobulunganisi nyonso. Kasi oyo ya Nzambe ezalaka na kotatabana-tatabana te, kita-mata, kende-zonga. Atiaka yango nyonso mpenza ndenge moko. Iyo, misié. Ndenge moko mpenza, mikolo ntuku misato na sanza; ezali te ntuku misato na moko, na nsima ntuku misato, eloko mosusu. Bomoni? Kasi nyonso wana esalemaki kokokana na nkita monene ya Nzambe, mpo Lingomba ékoba kosenzela mpe kobondela, komilengela, ná bilamba na bino esukwami na Makila ya Mwana-mpate. Kasi, oh, na mikolo ya nsuka oyo, Alakaki! Ah-hah. Sikawa tomoni epai wapi tozali kobika. Sikawa, bókanisela, ntina, ntina bobele moko, ezalaki kosala likambo oyo.

⁷² Sikawa, soko ezalaki nsambo...Bótala, mikolo ezali mpenza ntuku minei na libwa...mibu ntuku minei na libwa, kútu nde, ntango ya kotongama ya tempelo. Oyo nsambo, ezali mpóso nsambo ya lisakoli, mpóso nsambo, mpo mpóso nsambo ekatamaki mpo na tempelo, mpo na kotonga lisusu tempelo. Mpe etongamaki mpenza na mibu ntuku minei na libwa. Sikawa tozui ndimbola ya ntango ya bampóso, mpamba te soki Biblia elobaki, Mwanje alobaki, esengelaki mpóso nsambo mpo na kotonga tempelo. Mpe ezuaki mpenza mibu ntuku minei na libwa mpo na kotonga tempelo, kobanda—kobanda mokolo ya

14 na sanza ya Misato kino mobu L.K. 5—538. Kino tempelo ezóngisamáki lisusu, mpe ba-balabala ezongisamaki lisusu, mpenza mibu ntuku minei na libwa. Boye, eloko nini tososoli na yango? Eloko nini tososoli na yango? Mpo, soki mpóso nsambo elakisi mibu ntuku minei na libwa, boye, mpóso moko epesi mibu nsambo. Mpe nsambo mbala nsambo epesi ntuku minei na libwa. Ezali mpenza bongo. Yango mpenza.

⁷³ Boye sikawa, tokotatabana lisusu te mpo na yango. Toyebi sikawa, ete mpóso moko na moko elingaki koloba mibu nsambo. Bososoli yango? Tóloba yango elongo: “Mpóso moko epesi mibu nsambo.” Sikawa toyebi ete tososoli yango. Mpóso moko epesi mibu nsambo.

⁷⁴ Tala biso oyo *awa*, *awa* mpenza, mpóso ya liboso. Mibu ntuku minei na libwa mpo na kotonga lisusu tempelo. Sikawa, molongo oyo ya likoló ezali kotalisa ekólo ya Bayuda, molongo oyo eleki. Ezali kaka ntango. Mpe ntango ekiti *awa*, elongwe na ekólo ya Bayuda, ekoti na ntango ya Mabota. Na nsima emati lisusu mpe ezui Yisraele, mpe ekobi na yango.

⁷⁵ Sikawa, ntango ata moko te ekatamaki mpo na Mabota. Elobaki kaka: “Ntango ya Mabota.” Tomoni ete ata Yesu akatelaki bango ntango te. Mpo tomoni *awa*, na Luka 21:24, Alobaki: “Bakonyata bitutú ya Yelusaleme kino Mabota...” Nátangela bino yango. Nazali koloba yango kaka na motó. Nátanga yango, mpo ekotiamana na bande *awa*, mpe tolingi kondimisama ete tososoli yango malamú. Malamú, soki bolingi kotánga yango elongo ná ngai, na Santu Luka 21:24. Nayekolaki likambo oyo na polele mpenza, makoki na ngai nyonso.

Mpe bakokweya liboso na mpia na mopanga, mpe bakokambama...

Banani Ye azali kolobela? Bayuda. Ezalaki kobebisama ya tempelo, na mobu A.D. 70.

...mpe bakomemama na boombo na bikólo nyonso,...

Sikawa bómikanisela, kaka na Babele te, kaka na Róma te, kasi na “bikólo nyonso.” Kuna nde epai Bayuda bazali lelo, na “bikólo nyonso.”

...mpe Yelusaleme ekonyatama na Mabota, kino ntango ya Mabota ekokoka.

⁷⁶ Na bongo, ezali na ntango moko oyo epesami, kasi moto moko te ayebi ntango nini yango ekozala. Bomoni? Ezali libombami, bomoni, ntango ya Mabota. Kasi, Bayuda... Na bongo, tokoki koyeba ntango te na makambo ya Lingomba, soko Ezongá nsima to Ezokende liboso, to nini Ezali kosala. Bayebaka yango bongo te. Kasi, bótala Bayuda, yango nde manáka ya ntango. Bomoni yango? Nzambe akatelaki bango mpenza mokolo, ngonga mpe ntango, kasi Asalaki yango ata

moke te mpo na Mabota. Asalaki bongo na Bayuda, boye, tótala Bayuda, na bongo, tokomona esika nini tokómi.

⁷⁷ Sikawa, sikawa, mpóso nsambo yango ezalaki mibu ntuku minei na libwa. Tososoli yango polele sikawa, ete mpóso moko ezali—mpóso moko ezali mibu nsambo; mpóso moko, mibu nsambo.

⁷⁸ Sikawa toyebisami: “Longwa kosakolama ya mobeko. . .” Sikawa, awa nde esika kpókósó eyei. Sikawa toyebisami:

. . . *longwa na kobima na liloba ya kozongela kotonga engumba kino na Masiya (mpe Masiya ezalaki Klisto, na ntembe te) ekozala mpóso nsambo, mpe mposo ntuku motoba na mibale, (esali mpóso ntuku motoba na libwa). . .*

Bomoni? Malamu. Mpe nsambo mbala ntuku motoba na libwa esali mibu nkama minei na ntuku mwambe na misato. Sikawa, bozokoma yango? Soko bolingi ete názungela yango, nakozala na esengo ya kosala yango.

⁷⁹ Sikawa toyebisami: “Longwa na kobima na liloba ya kozongela kotonga engumba, kino na Masiya, ekozala nsambo,” (nsambo, wana ezali ya liboso—ya liboso, awa) “mpóso nsambo, mpe ntuku motoba na mibale,” esali, ntuku motoba na mibale mpe nsambo ezali ntuku motoba na libwa, mpóso ntuku motoba na libwa. Nsambo mbala ntuku motoba na libwa ekosala nkama minei na ntuku mwambe na misato. Na yango, kino na Masiya. . . Sikawa, tokómi na eteni oyo *awa*. Kino na Masiya, esengeli kozala mibu nkama minei na ntuku mwambe na misato, mibu nkama minei na ntuku mwambe na misato.

⁸⁰ Sikawa, sikawa, Yesu, Masiya akotaki na engumba ya Yelusaleme, na elóna, likoló na mokongo ya mbalata ya mpembe, na Eyenga ya Mangalála, mokolo ya 2 na sanza ya Minei, na mobu A.D. 30. Yesu akotaki na Yelusaleme na Eyenga ya Mangalála, na mobu A.D. 30. Mpe sikawa, sikawa, kobanda mobu L.K. 445 kino mobu A.D. 30, epesi mpenza mibu nkama minei na ntuku nsambo na mitano.

⁸¹ Kasi, lokola tosilaki komona, ete mpóso ntuku motoba na libwa esali mibu nkama minei na ntuku mwambe na misato. Sikawa, na esika wana nde kpókósó eyaka, esika wana mpenza. Bomoni? Tozali kaka na, kotala bilembo ya Biblia awa, ya ntango, tozali kaka na mibu nkama minei na ntuku nsambo na misato. Mpe, na bosolo, ezali mibu nkama minei na ntuku mwambe na misato, bokeseni ya mibu mwambe.

⁸² Sikawa, Nzambe akoki kozanga yango te. Soko Alobaki ete ekozala mikolo ebele boye, ezali mikolo ebele yango. Soko Alobi ete ezali mingi boye, ezali bongo. Boye, tokosala nini? Sikawa, kobanda mobu L.K. 475 kino mobu A.D. 30, ezali mibu ya Julian to mibú ya bonganga minzoto, oyo ezali nkama misato na ntuku motoba na mitano mpe moko ya minei ya mokolo na—na moko

moko. Kasi soko tokitisi mikolo yango na manáka na biso ya lisakoli. . .

⁸³ Sikawa nátelema naino awa mwa moke. Mpo bókoka koyeba na ntembe ata moke te, Nakozua esika kaka moko wana te. Nakoki kozua yango na kati ya Makomi mobimba mpe kotalisa bino ete mikolo nsambo ezali nsambo wana, mpóso moko ezali—ezali mibu nsambo, na Biblia. Nauti kosala yango awa, na Emoniseli mokapo ya 13, to mokapo ya 11, molongo ya 3. Basakoli yango bakosakola mikolo nkóto moko na nkama mibale na ntuku motoba, oyo ezali na katikati ya mpóso ya nsuka ya Bayuda, na nsima balongolami, mpe Amagedóna ebandi. Na bongo soko ezali bongo, yango wana lisusu, epesi mpenza mikolo ntuku misato na sanza moko. Bomoni? Na bongo, ezali—ezali te mikolo ntuku misato na moko, mpe mikolo ntuku mibale na mwambe, mpe bongo na bongo. Ezali bongo mpenza mikolo ntuku misato na sanza, ntango nyonso.

⁸⁴ Manáka na biso ya lisakoli ememi biso na mikolo nkama misato na ntuku motoba, oyo tozali kosalela sikoyo kati na Makomi. Tozali bongo mpenza na nkama minei na ntuku mwambe na misato. Yango wana mpenza, nkama minei na ntuku mwambe na misato. Awa tozui mpenza ndanga ya lisakoli, ezali mpenza solo. Mpo, longwa ntango na kobima naliloba ya kotonga tempelo, kino na kobebisama, ntango baboyaki Klisto mpe babomaki Ye na mobu A.D. 33, ntango Klisto abomamaki, epesi bongo mpenza mibu nkama minei na ntuku mwambe na misato.

Sikawa, longwa na kobima na liloba ya etinda mpo na kotonga lisusu Yelusaleme, mpóso nsambo ekatamaki, elingi koloba mibu ntuku minei na libwa. Mpe mibu ntuku minei na libwa epesi yango mpenza. Malamu, longwa ntango tempelo etongamaki lisusu kino na Masiya, epesaki mibu nkama minei na ntuku misato na mwambe. Boye, mibu nkama minei na ntuku mis- . . . nkama minei na ntuku misato na minei. Mpe nkama minei na ntuku misato na minei (ntango), ntuku minei na libwa, epesi mpenza mibu nkama minei na ntuku mwambe na misato. Epesi mpenza—mpenza motángo yango, mikolo yango mpenza, mokolo na mokolo. Amen! Yango mpenza.

⁸⁵ “Masiya Mokonzi akoya.” Bomoni? Nsambo mbala ntuku motoba na libwa epesi nkama minei na ntuku mis- . . . na—na ntuku mwambe na minei. Mpenza, epesi mpenza—mpenza motángo yango. Boye, na bongo, toyebi malamau be, toyebi solo mpenza, ete Likomi wana elobi solo. Yango oyo. Kasi, bomoni, nyonso oyo. . .

⁸⁶ Ntango Nzambe asalaki mokili liboso na mpela mpe abomaki yango na mai, abongolaki mikolo ya bonganga minzoto; na nsima, atikaki Baroma báya kosala manáka na bango, oyo

esimbaka mpe epumbwaka, mpe bongo na bongo. Nakanisi ete, ata na encyclopedie oyo nazalaki kotánga. . .

⁸⁷ Toloba, kútu, Ndeko Kenny Collins, azali awa na ntongo oyo, Kenneth Collins? Oyebi ntango otindelaki ngai libóndo ya ba-encyclopedie wana? Ozomikanisela yango? Otindelaki ngai yango kuna, pene ya motuka mobimba na yango. Nakanisaki: “Líkílí lokola ngai, nyonso wana, nakosala na yango nini?” Oyebi, Nkolo nde azalaki kokamba yo, Kenny. Kuna nde esika nazuaki likambo yango, uta mpenza na encyclopedie ya kala wana, “ntango,” mpe nazalaki koyekola yango. Mpe Becky asalelaka yango na kelasi. Natiá yango na biró na ngai, kuna, na eteni na ndako na ngai ya mosala, na nsé. Tokitaki kuna, tozuaki yango, mpe kuna, tolukaki yango, mpe tomonaki yango, mpenza, na kati ya bamanáka mpe ntango nyonso oyo esilá kozala. Bomoni? Boye, tozuaki yango.

⁸⁸ Yango wana, mpenza, mibu nkama minei na ntuku mwambe na misato. Kolongwa na kobima na liloba ya kotonga lisusu—ya kotonga lisusu ndako yango, kino ntango Masiya Mokonzi aboyamaki, epezi mpenza mibu nkama minei na ntuku mwambe na misato, kokokana na manáka yango.

⁸⁹ Sikawa bomoni, tozali kosalela manáka yango moko oyo awa mpenza. Mpamba te, soko Nzambe asalelaki manáka oyo, na bongo, Asengeli kosalela yango na ntango nyonso oyo etikali kati ya Biblia. Boye te? Nzambe abongwanaka te. Boye, soko mpóso nsambo ezalaki mibu ntuku minei na libwa, mpóso nsambo lisusu ezali mibu ntuku minei na libwa. Mpóso moko ezali mibu nsambo, bomoni, boye, ebongi malamumu be. Mpe soko ekokanaki mpenza kuna, ekokokana lisusu mpenza. Amen! Oh, la la! Ezali kopesa ngai mpiko mpenza. Oh, Na—na—nalingaka, nalingaka koyeba likambo oyo nazali kolobela. Na—na—nalingaka yango.

Mpamba te, lokola mobange wana alobaki na ngai, kuna na Kentucky, alobaki: “Nasepelaka koyoka moto koloba, oyo ayebi likambo oyo azali kolobela.”

Nalobaki: “Ngai mpe.”

Alobaki: “Yango nde likambo ná bino batei, boyebaka te likambo oyo bolobaka.”

⁹⁰ “Ee,” nalobaki, “nasepeli na maloba na yo, kasi ezali na makambo mosusu oyo biso toyebi oyo tozali kolobela.” Uh-huh. Ya solo. Nayebi ete nabótámi mbala ya mibale. Nayebi ete nasili kolongwa na kufa mpe koingela na Bomoi. Nayebi ete Nzambe moko azali, mpo nasolóla ná Ye.

Asilá koloba na nzela na ngai, kosolola ná ngai, mpe koloba na bamosusu, mpe koyebisa ngai na ntina na bato mosusu. Mpe nayebi ete Azali Nzambe. Ezali solo. Azalaki malamumu mingi mpo na kokita mpe kosala ete ngai názwama na photo elongo ná Ye, esika oyo mokili ya zébi ekoki koboya te. Mpe natalaki na Makomi mpe namonaki ete yango ezali mpenza kokokisa

eleko ya lingomba oyo, makambo oyo ezali kosalema mpenza, na bongo, nayebi ete tokómi wana. Amen.

⁹¹ Sikawa, ntango mosusu totángá na biso mingi te. Ntango mosusu tozali na biso bato minene te, ná makambo ya ndenge wana. Ntango mosusu tozali na biso bato na lokumu te, kasi toyebi Nzambe. Toyebi Ye mpo Molimo Mosanto moko ezali, bomoni, mpe yango ekokanisaka, Liloba-na-Liloba, kati ya Makomi mobimba, na bongo, toyebi ete yango ezali ya solo. Tozali kobika na mikolo ya nsuka.

⁹² Sikawa, na esika wana, bómikanisela sikawa, ete, mobu ya lisakoli oyo, ya mikolo nkama misato na ntuku motoba kati na mobu. Bótala makambo mosusu nyonso. Bozalisi, soko bamosusu kati na bino bokoki kososola, ata mpo na basi, mpe bongo na bongo. Bomoni? Mikolo ntuku misato, ntuku misato, bótala ete e—ezali. . .Bozalisi nyonso esálémá ndenge wana. Bomoni? Ntuku misato na moko te, ntuku misato, ntuku mibale na mwambe, to eloko mosusu. Ezalaka mpenza mikolo ntuku misato. Na mobu nyonso, oyo wana ezali manáka ya lisakoli, mikolo nkama minei na ntuku mwambe na misato mpenza.

⁹³ Awa tozui elembeteli mpenza ya lisakoli, mibu nkama minei na—na ntuku minei na mitano, liboso, ezalaki mpenza bongo. Sikawa, makambo nyonso oyo esakolamaki mpo na kokokisama. Mpe mpóso ntuku nsambo wana etikálá kokokisama na ntango yango te, boye, etikáli mpo na mikolo ya nsuka sikawa.

⁹⁴ Sikawa, bandeko na ngai ba-Pantekotiste, sikawa, bandeko na ngai ba-Temoins de Jehovah, bososoli? Boyebi esika nini bato nkoto mokama na ntuku minei na minei bamonanaki? Boyebi esika nini bikamwa minene nyonso ya Emoniseli emonanaki? Kuna na eleko ya Bayuda, na oyo ya biso te. Eloko moko te ekomami na ntina na yango, kaka Lingomba komilengeláká mpo na kokende. Ya solo mpenza, ná nguya na Nzambe, tozali kosala bikamwa mpe makambo minene. Toyebi yango. Kasi likambo ya solosolo ezalaki awa epai na Bayuda; Nalingi koloba, nguya ya solo, oyo esalaka misala, oyo esalaka bikamwa. Minei. . .

⁹⁵ Mokama na ntuku minei na minei bamonani kuna te. Bazali kuna na. . .Bamonani na mokapo ya 3. Bazali kuna na kati ya Makomi, mosika. Sikawa, tomoni ete makambo nyonso oyo esengelaki kosalema, ezalaki na ntango oyo ya mpóso ya ntuku nsambo, mpóso oyo ya nsuka. Sikawa, soko basilaki kozua mpóso ntuku motoba na libwa, mpe babikelaki yango mpenza lolenge oyo Nzambe alobaki, mpe esalemaki mpenza ndenge Nzambe alobaki ekosalema, na bongo ezali na mpóso moko lisusu oyo elakamaki mpo na Bayuda. Sikawa, bandeko, bómilengela. Bomoni? Bomoni? Bóyoka ndenge tokómi pene. Mpóso ya nsuka, nsambo, mobu ya nsambo.

96 Sikawa, moto nyonso asosoli kino awa, soko bososoli? Moto nyonso azali kososola kino awa, ete ezali mpenza-mpenza Solo. Ezali Biblia. Ezali mibu ya lisakoli.

97 Sikawa tokómi kino awa, mpe tolandi bango kino ntango baboyaki Masiya, bomoni, kobanda na . . . kino na koboyama ya Masiya, mpóso ya nsuka.

98 Sikawa, nalingi kotelema awa mwa moke mpe kolimbola likambo oyo. Ete, ntango baboyaki Masiya, ezalaki, na bosolo, ntango baboyaki Yesu lokola Mobikisi, mpe babákaki Ye na ekulusu. Bómikanisela awa, likambo oyo Biblia elobaki: “Mpe Akolongolama, kasi mpo na Ye moko te, Masiya, Mokonzi.” Sikawa, bókánisa ndenge lisakoli yango ekokisamaki siki-siki. Nalingi kokotisa likambo yango malamú mpenza na kati na bino. Ete, soko lisakoli yango ekokisamaki mpenza na mokolo yango, na ntango yango mpenza, mpe na lolenge mpenza oyo elobáki ekosalema, nsambo mosusu oyo, mpóso nsambo moko oyo etikali, mibu nsambo moko, kutu, (mikolo nsambo: mibu nsambo), ekokokisama mpenza kokokana na Makomi.

99 Sikawa bómikanisela, Alongolamaki, Masiya. Bayuda, Nzambe atikaki kosala ná bango. Bakendeki mosika koleka te. Na bongo bapalanganisamaki na Bokonzi ya Roma. Na bongo, soko botali malamú na liyemi na ngai awa, nalingi ete bósosola likambo oyo sikawa, mpe bóyema yango. Bomoni awa esika oyo natiaki ekulusu? Wana nde esika oyo baboyaki. Kasi ntango ebakisamaki mwa moke mosika koleka wana, bomoni. Mpo na nini? Ntuku misato, ntuku minei, ntuku mitano, ntuku motoba, ntuku nsambo. Nsima na mibu ntuku minei, Titus, mokonzi na mapinga ya Roma, abebisaki Yisraele, Yelusaleme, mpe apalanganisaki bato na mokili mobimba. Bomoni, Titus, mibu ntuku minei na nsima. Boye, na bosolo, ntango ya Bayuda ebakisamaki kino mobimba na . . .

100 Nzambe azalaki kosala lisusu ná bango te. Azalaki kosála bobele ná bango kino ntango baboyaki Klisto. Na bongo, ntango babákaki Klisto na ekulusu, bagángaki: “Tika ete Makila na Ye ézala likoló na biso ná bana na biso,” mpe esalemá bongo kobanda wana. Kasi liboso bápalangana . . . Bóyoka! Oh, ndeko! Liboso bango nyonso bápalangana na mokili mobimba, ezuaki Nzambe pene na mibu ntuku minei mpo na kobebisa tempelo mpe kopalanganisa bango na mokili mobimba. Kasi Nzambe aboyaki kosala lisusu ná bango. Nzambe aboyaki kosala lisusu ná bango.

Akendeki kosala ná Mabota. Boyebi yango, bososoli yango sikawa? Sikawa, awa, tobandi bileko ya lingomba, ntango ya bato ya Mabota, Nzambe atiki Bayuda.

101 Sikawa, ndeko na ngai missionarye, oyo akendeki epai—epai—epai na Bayuda, ndeko molingami ya motuya, oyo azali awa, esika moko boye. Awa nde esika nalingi ete bósimba

malamu mpe bósosola. Bomoni, Nzambe akataki kosala ná Bayuda kaka wana, mpo Nzambe asalaka ntango nyonso ná Yisraele lokola ekólo. Biso nyonso toyebi ete Yisraele ezali ekólo. Mabota bazali bato, mpe Asengelaki kobimisa bato uta na Mabota, mpo na Nkombo na Ye. Tokokóma wana nsima na minúti moke.

¹⁰² Kasi sikawa, kati na bileko oyo nsambo ya lingomba oyo touti koyekola, na ntango ya Mabota, banda na kobakema ya Klisto na ekulusu kino nsuka ya bileko ya lingomba. Sikawa, tomonaki yango. Toyekolaki yango, na molai. Sikawa tobandi kokóma na esika oyo tokoki kokóma na likambo oyo, kokóta na Bilembo Nsambo, Mbeki Nsambo, Kelelo Nsambo, mpe nyonso wana, mpe komona elílingí na yango na mobimba; nyonso oyo etali Bayuda, mpe etúmbu ya Nzambe epai na bato ya mokili. Mpe litiká . . .

¹⁰³ Bómikanisela, na ntango monene oyo ya minyoko, bamilió ya bato na Mabota bakokufa kati na yango. Mwasi na libala oyo aboyamaki, li—litiká ya momboto ya mwasi, mongondo oyo alali mpongi, akoleka kati na yango. Ezali—ezali mpenza polele, lokola mpóso ntuku nsambo oyo; polele mpenza. Mpe bakoleka kati na yango. Boye, soko ozali na Molimo Mosanto te, ekozala malamu ete óbanda koluka Yango na lombangu mpenza. Tokómi na ntango ya nsuka.

¹⁰⁴ Sikawa bótala, bileko nsambo ya lingomba. Sikawa, nakosengela kolobela yango te, mpo tozali na yango na bande, mpe ezali kotiana na ba-buku mpe nyonso wana. Ete, wana ezalaki eleko oyo Nzambe atikálá koloba te ete ekozala na mikolo mingi boye, ngonga mingi boye, to mibu mingi boye; Atikálá koloba eloko moko te. Alobaki: “Kino ntango ya Mabota ésila.” Alobaki: “Kino!” Bitutu yango ekonyatama, kino ntango Nzambe akosilisa kosala ná Mabota.

¹⁰⁵ Sikawa, tomoni ete na kati ya bileko yango, Molimo Mosanto eyaki. Mpe Nzambe, kuna na ebandeli, abandaki koyebisa na ntango wana, ntango Klisto aboyamaki, Nzambe atalisaki Yoane mpenza, makambo oyo ekosalema na ntango ya bokonzi ya Mabota. Sikawa, bomoni, tozali na ntango oyo ekatami te, lokola Bayuda, kasi tozali na elemboto moko. Tozali na—tozali na likonzi ya elemboto moko. Malamu, Nzambe asalaki ná Bayuda mpenza makambo oyo Alobáká Akosala na mibu ntuku motoba na libwa wana, to, ezalaki mibu nkama minei na ntuku mwambe na libwa, kasi mpóso ntuku motoba na libwa. Mpe etikali mpóso moko, mpóso moko etikali naino ékatama.

¹⁰⁶ Sikawa, tokoki kotia yango na kati *awa* te, mpo oyo ezali Mabota, Lingomba. Sikawa, bato boni basosoli yango? [Losambo balobi: “Amen.”—Mok.] Sikawa, oyo ezali Emoniseli, kobanda na mokapo ya 1, kino na mokapo ya 3, ememi biso kino na Laodikia. Sikawa, tomoni mpenza lolenge oyo nyonso

wana ezalaki Lingomba, mokili ya Lingomba yango moko. Nzambe atikálá te kotia mosumuki na kati, ye. . . bobebe soko alingi kobikisama. Kasi, mokili ya Lingomba ezalaki nyonso mpembe; nsima na yango, Banikolaiti bayaki, baoyo balingaki kosala ebongiseli. Bato ya lokumu bakotaki na kati na yango. Esalemaki na Nicée, na Róma, ntango basalaki Likita ya Nicee. Mpe basalaki nini? Bakómisaki lingomba ebongiseli, bongo babandaki konyokola Baklisto. Na nsima, na eleko ya lingomba oyo elandaki, yango, Boklisto, na oyo etali libatisi ya Molimo Mosanto, elongolamaki penepene na mobimba.

¹⁰⁷ Kasi na nsima, bino boyebi, ete nazongaki mpe nazuaki histoire ya *Batata Ya Nicee*, mpe *Batata Ya Liboso Na Nicee*, mpe masolo nyonso ya lingomba, mpe nkomá ya kala koleka, oyo nakokaki kozua, mpe moko mna moko na yango etalisaki bino polele ete Lingomba oyo Nzambe azalaki kolobela ezalaki ebongiseli ya lingomba Katoliko wana te, to ebongiseli mosusu mpe te. Nzambe azalaki kolobela, mpe minzoto minene nyonso wana ya eleko, ezalaki bato oyo balakisaki libatisi ya Molimo Mosanto, libatisi na Yesu Klisto, mpe boyei ya Molimo na Nzambe, mpe—mpe minoko na sika, ná ndimbola ya minoko na sika, ná lobiko na nzoto, ná bikamwa mpe bilembo. Yango nde Nzambe apesaka. Akoki kobongola makanisi na Ye te, koloba: “Ee, oyo nde likanisi na Ngai mpo na Lingomba, Lingomba ya bantóma; sikawa likanisi na Ngai ezali lingomba ya bato ya lokumu.” Nzambe abongwanaka te! Ezali Molimo Mosanto kino lelo.

¹⁰⁸ Mpe totalaka yango mpe toteyaka yango, bongo, ntango tomonaka lolenge ya Nzambe mpe oyo Ye. . . na nsima, totalisaka Makomi na Ye. Na nsima, tozuaka i—istwar oyo etalisaka ete esalemaki mpenza bongo; na mokolo yango mpenza, na ngonga yango, na nyonso oyo Nzambe alobaki na nzela na Yoane, ete ekosalema, esalemaki na eleko wana ya Mabota.

¹⁰⁹ Sikawa, tozuami, na ntembe ata moke te, na Eleko ya Laodikia. Toyebi ete tozali wana. Tolekaki na Eleko ya Luther; tolekaki na eleko ya Wesley; sikawa tokómi na Eleko ya Laodikia, eleko ya nsuka. Mpe tososoli ete mangomba moko na moko wana ezalaki na motindami. Tomonaki yango. Minzoto nsambo na loboko na Ye, ezalaki Milimo Nsambo oyo ebimaki liboso na Nzambe. Moko na moko ezalaki na motindami. Topusanaki mpe tomonaki, na nzela na Biblia, lolenge nini motindami yango akozala, lolenge nini motindami yango akozala na yango. Mpe tozuaki moto oyo kati na istwar, azalaki na lolenge yango. Na nsima, ntango tomoni moto yango, na istwar, oyo azalaki na lolenge yango, toyaki komona ete azalaki motindami na eleko ya lingomba wana. Na nsima, tomonaki Molimo nini, mpe eloko nini moto yango asalaki. Mpe tomonaki ete azalaki mosantu atondisamaki na Molimo Mosanto, Santu Ireneé, ná bamosusu nyonso wana, mpe—mpe

Santu Colomban, na bato nyonso wana batondisamaki na Molimo. Mpe toyebi yango, na nzela na Makomi, ete lolenge ya Molimo wana esengelaki kozala likoló na moto ya lolenge wana mpo na ntango moko yango. Ezali yango mpenza, boye, ekoki kozala na libunga te. Amen! Nkembo na Nzambe! Yango. . .

¹¹⁰ Nayebi te, ndeko. Wana ezosala mingi epai na ngai koleka eloko mosusu nyonso oyo nayebi, bomoni, mpo Liloba na Nzambe ezali koloba Yango moko. Ntango nayokaka Nzambe koloba likambo moko, nalobaka: “Amen! Ezali ya solo. Ezali solo.” Bomoni? Ekati likambo. Esili nye. “Nzambe alobaki bongo.” Oyo wana esukisi yango.

Malamu, Nzambe alobaki ete ekosalema lolenge wana, mpe tomonaki yango na istwar mpe na nzela na Makomi. Totangaki na ntina na eleko ya lingomba oyo, oyo yango ekozala, eloko nini ekosalema, lolenge ya motindami nini ekosengela mpo na eleko ya lingomba yango. “Epai—epai ya mwanje ya lingomba ya Laodikia. Epai ya mwanje ya lingomba ya Salade, Tuatila,” bileko nyonso oyo. Mpe tozongaki na istwar mpo na komona mo—motindami ya lingomba yango, mpe tomonaki ezalaki nani. Na bongo, toyemaki yango, totiaki bankombo na bango na nsé na yango, mpe tala bango wana. Bomoni, toyebi ete ekokanaki mpenza.

¹¹¹ Sikawa, mpe toyebi ete Nzambe azalaki, azalaki ntango nyonso, azalaka ntango nyonso, kotelemela losambo ya ebongiseli. Iyo, misié. Alobaki yango, “Banikolaiti, oyo nayinaka!” *Nikao* elingi koloba “kokonza bandimi.” *Laity* ezali, *laity* ezali, “lingomba, nzoto.” *Nikao* elingi koloba “kokonza, kolóngá,” na elobeli mosusu, “kokomisa moto moko mosantu, moto moko likoló na mosusu.”

Biso nyonso tozali bana. Tozali na Mokonzi moko, ezali Nzambe. Tozali na Mosanto Moko, ezali Nzambe. Amen! Mpe Azali katikati na biso, na lolenge ya Molimo Mosanto. Ye nde Azali Mosanto.

¹¹² Sikawa, tokómi kino na esika oyo tondimisami mpenza, ete kati na—na eleko ya Bayuda, tomoni mpenza mpóso ntuku motoba na libwa yango, na istwar, na manáka, na mobu ya lisakoli ya Nzambe, tolandaki lisolo ya manáka ya lisakoli, kobanda na Kondimana na Kala kino na oyo ya Sika, mpe totalisaki ete ezali mpenza ndenge moko. Bomoni?

Sikawa tozali na lingomba ya Mabota longwa ebandeli, kino na mokolo ya nsuka, mpe toyebi ete tozali kobika na mokolo ya nsuka. Amen! Bososoli? [Losambo balobi: “Amen.”—Mok.] Sikawa, na bongo, soko tozali kobika na mokolo ya nsuka oyo, na nsuka ya eleko oyo, na bongo, tokómi wapi?

¹¹³ Bótala, na nsima awa, bomoni molongo oyo toyemi *awa*, epai wapi Nzambe azalaki kosala ná Bayuda. . . To, atikálá kosala ná Bayuda te, ezuaki Ye ntango molai mpo na komema bango.

Ezuaki Ye mibu ntuku minei mpo na komema bango na lolenge oyo Akokaki kobomisisa bango, na bikólo nyonso. Na bisika nyonso, na mikolo ya Mabota, Asengelaki komema bango na lolenge wana liboso Ákoka kosala ete Liloba na Ye ékosisama. Bomoni oyo nalingi koloba? Baoyo nyonso basosoli yango, bóloba: “Amen!” [Losambo balobi: “Amen.”—Mok.] Bomoni, nalingi kondimisama ete bososoli yango.

¹¹⁴ Sikawa, likambo nini esalemaki? Bótala awa likoló na eleko ya lingomba ya nsuka oyo. Bomoni ndambo oyo ebakisami? Mikolo ya Mabota ezali kokóma na nsuka. Mpe na mibu ntuku minei ya nsuka oyo, Bayuda bazali kozonga na Yelusaleme, bazali kozonga na mabelé na bango. Aleluya! Bomoni esika nini tokómi? Ezuaki mibu ntuku minei, kobanda ntango Masiya alongolamaki, kino ntango Titus abebisaki tempelo mpe apanzaki Bayuda. Esalaki mibu ntuku minei mosusu oyo Nzambe ayeisaki makasi mitema ya ba-Falo ya ndenge na ndenge na bisika nyonso, mpe akambaki Bayuda kozóngá na mabelé na bango. Kasi lelo basili kozonga na mabelé na bango, mpe Lingomba ekómi na nsuka. Amen! Oh, na—na—nazomeka kotángá; nazokoka te.

¹¹⁵ Bótala, Bayuda bazali na mabelé na bango, mpe bazali kozonga kuna. Soko botángi *Nsuka ya Etumba ya Mokili Mobimba*, buku ya mibale, ntango General Allenby, nsima na Etumba ya Liboso ya Mokili Mobimba, akómaki likoló ya Yelusaleme, na mpépo, mpe akangaki yango, mpe azuaki Yelusaleme. Mibali Baklisto wana oyo bakotaki na Yelusaleme, balongolaki bikoti na bango. Mpe Allenby amipesaki, kozanga ata kobeta lisasi, to—to, bango nde bamipesaki epai ya Allenby, ba-Turk. Kobanda wana, Nzambe abandaki koyeisa makasi motema ya Mussolini, motema ya Hitler, motema ya Staline, mitema ya bato bisika nyonso na bikólo, koyináká Bayuda.

¹¹⁶ Nsima, ba-ndeke minene-minene ekitaki, babengaki yango Eastern Airlines, to Pan American Airlines, to nyonso oyo yango ezalaki, nabanzi bazalaki kobenga yango TWA, Ezalaki na—na zulunále, zulunále *Life*, nabanzi ezalaki *Look to Life*, nabanzi ezalaki *Life*, esali kaka mibu misato to minei, Nzambe azali kozongisa Bayuda na mabelé na bango, baoyo bazalaki mosika na yango banda mibu nkóto mibale, wana bato ya Mabota bazalaki komiléngela. Sikawa, bato ya Mabota babimisi Klisto libanda na lingomba, kokokana na Emoniseli mokapo ya 3. Akoki ata kozonga na lingomba na Ye te. Azali na esika ya kokende te. Aboyami.

¹¹⁷ Ntango ekoki mpo na Konétolama. Basíkolami nyonso oyo bazalaki kino *awa*, matónó mike-mike oyo boye, ezali komata ya basantu na lisekwa. Bomoni, biso nyonso tokokutana *awa*. Biblia elobi: “Biso baoyo tozali na bomoi mpe totikalali mpo na boyei ya Nkolo, tokokende liboso te to tokopekisa te baoyo balali.” Ntango nyonso, kobanda *awa*, *awa*, mpe *awa*.

¹¹⁸ Ndenge nini, ndeko Pantekotiste, ndenge nini okoki kotia bango nyonso awa, na Eleko ya Lingomba ya Laodikia?

Bazali—bazali kolala, kati na bileko moko na moko oyo, bazozela. “Biso baoyo tozali na bomoi, bato moke oyo totikali awa, oyo totikali na bomoi kino na... Boyei na Nkolo, tokopekisa te baoyo balali; mpamba te kelelo ya Nzambe ekoyula, mpe bakúfi kati na Klisto bakosekwa liboso; mpe tokonétolama elongo ná bango,” amen, “elongo ná bango,” tala biso *oyo*, tosangani *awa*, “mpo na kokende kokutana ná Nkolo na mipepe.” Yango mpenza. Tokómi wapi? *Awa* mpenza. Masiya alongolamaki wapi? Na esika mpenza oyo Liloba elobaki. Mpóso yango ya ntuku nsambo, ekobanda wapi? Mpenza nsima na Lingomba oyo kolongolama. Nsima na yango Nzambe akozonga epai ya Bayuda.

¹¹⁹ Bozoyeba lisusu te? Ete kaka na ntango oyo Lingomba ekei. Lingomba ekei, nsima na yango ekómi ngala ya Bayuda, mpo na kokota. Kasi, liboso, likambo oyo ekoya na molongo, ezali te kolamukisa ya nguya ya ekólo—ya ekólo mobimba, katikati na bato ya Mabota. Likambo ekoya nsima na molongo, ezali boyei ya Bokonzi na Nzambe, Boyei na Klisto.

¹²⁰ Sikawa, soko bolingi, tokoki kozonga awa sikawa, na Danyelee mokapo ya 2, molongo ya 34 mpe molongo ya 35. Mpe ntango Daniele apesamaki... mokapo ya 2, 34 mpe 35, ntango Danyelee apesamaki emononeli, ete ntango ya libota na ye ekómaki na nsuka, mpe na mwa ntango, mpe amonaki bato ya Mabota kokota, amonaki emononeli ya libanga monene oyo, awa, to, ekeko monene oyo, oyo ezalaki na motó ya wólo, mpe ntólo ya palata (Sikawa bótala malamú, ékokóma makasi koleka, palata kino na wólo.), oyo elandi, bibelo ya ebende, to, ya motáko, na nsima, makaká mpe makolo ya ebende, kasi misapi ya makolo, ezalaki misapi zomi, mpe misapi yango ya ebende mpe mabelé ya ntóki, mpe alobaki: “Ndenge omoni ete ebende ekosangana na mabelé ya ntóki te, ba-bokonzi bokabwani oyo, ekosangana moko na mosusu te, kasi ekosangisa mimboto na yango, komekáká kobuka nguya ya mosusu.” Bomoni?

¹²¹ Sikawa, likambo nini esalemaki, motó ya wólo ezalaki Nebukadanesala, ndenge alimbolaki yango. Alobaki: “Mokonzi mosusu akoya mpe akozala na nsé na yo,” ezalaki Darius, ya ba-Madaí mpe ba-Palasa, oyo azuaki bokonzi ya Mabota. Oyo elandaki, nsima na ba-Madaí mpe ba-Palasa, ezalaki nini? Ba-Greki, Alexandre Monene, mpe bongo na bongo; Ba-Greki bazuaki bokonzi yango. Na nsima banani bazuaki yango na Ba-Greki? Baroma. Banani bayángelaki mokili ya Mabota kobanda wana? Baroma! Baroma, sikawa, ezalaki ebende.

¹²² Na bongo, bótala, Róma ezali kino na nsuka, mpo ekendeki kino na nsuka ya misapi ya makolo. Mpe amonaki potópoto, mabelé ya ntóki; wana ezali nde bato, yango nde tosalémá na

yango. mpe ebende, makasi ya Roma, ezuamaki na bikólo nyonso wana. Roma ezali na makasi na kati ya bikólo nyonso na nsé ya Lola.

¹²³ Ezali na moto kaka moko na mokili, oyo akoki kotelemisa etumba to kobandisa etumba, kozanga ete. . . na koloba bobele liloba moko. Ezali pápa. Bongo soki alobi: “Mokatoliko moko te ásimba mandóki.” Yango ekokata likambo, ndeko, lobá nyonso oyo olingi koloba. Bato mingi koleka na mokili, na Boklisto, bazali Bakatoliko. Bomoni? Malamu. Tika áloba kaka liloba moko, wana nde yango.

¹²⁴ Kaka ndenge balobaki awa: “Nani. . .” Tokolobela yango na nsima. “Nani akoki kobunda na nyama? Nani akoki koloba lokola ye? Nani akoki kosala yango? Na bongo, tósala ekeko mpo na nyama.” Wana ezali lisanga ya mangomba, “kosala ekeko oyo ekokani na yango.” Bomoni? Kosangisa ba-denominations elongo, nde eloko oyo basili kosala yango. Oh, tokómi mpenza na nsuka. Wana nde nyonso yango ezali, moninga. Tokómi wana, na nsuka. Bomoni? “Tósala ekeko mpo na nyama,” eloko moko oyo ekokani na yango. Ekeko ezali eloko oyo ekokani na eloko mosusu. Bomoni? Sikoyo tokómi na ntango ya nsuka.

¹²⁵ Sikawa bótala awa, na nsuka ya eleko oyo. Sikawa, Danyele, na mokapo ya 2, na molongo—molongo ya 34 mpe 35, atalaki ekeko yango malamau mpenza. Atalaki yango malamau kino ntango Libanga moko elongolami na ngomba, na maboko te, Ekitaki mpe Ebetaki ekeko yango na makaká, mpe epanzaki yango. Sikawa, Etikálá kobeta yango na motó te, sikawa. Ebetaki yango na makaká; wana ezalaki ntango ya nsuka, misapi zomi ya makolo wana.

¹²⁶ Bomonaki yango, awa mpenza, kaka liboso Mr. Eisenhower ábima, Protestant ya nsuka ya e. . . ya Amerika, lokola—lokola Mokonzi, kútu, nandimi te ete mosusu akozala. Kasi—kasi ntango. . . kaka mpo na kotalisa ete, kaka mpo bato bálamuka. Ntango akutanaki, ezalaki na. . . Bokutani ya nsuka oyo (bango) akutanaki na Russia, bikólo mitano ya ba-communiste ya Esti oyo ezalaki kuna, bikólo mitano ya Westi. Mr. Khrouchtchev azalaki mokambi ya bikólo ya Esti. Mr. Eisenhower azalaki mokambi ya bikólo ya Westi. Mpe Khrouchtchev, ndenge nasóli mpe bayebisi ngai, ete na lokóta ya Russia, *Khrouchtchev* elingi koloba “mabelé ya ntóki.” Mpe *Eisenhower* elakisi “ebendé,” na Anglais. Yango nde ebendé ná mabelé ya ntóki, ekosangana te. Mpe alongolaki sapato na ye mpe abambáki yango na mésá, mpe nyonso mosusu wana. Ekosangana te.

¹²⁷ Kasi ezalaki na mikolo ya bokonzi oyo nde Libanga yango, Libanga oyo elongwaki na ngomba, na lisungi ya maboko te, ebetaki elilingi yango na makaká. Sikawa: “Elongwaki na

ngomba.” Esengelaki kozala ngomba ya libanga. Elongwaki na ngomba ya libanga. Sikawa, bomonaki yango?

¹²⁸ Sikawa, bandeko batei, bandeko mibali mpe bandeko basi, na mokili mobimba. Na bososoli na ngai, Biblia ya liboso oyo ekomamaki, Nzambe akomaki yango na likoló, mpo basengeli kotala likoló mpe komona ete Nzambe mo—moko azali na Likoló, ete Nzambe azali likoló na bango. Mpe soko botali na zodiak. . . . Sikawa moto moko te kati na bino ákende. . . . Bókangama bobele na Biblia oyo. Bomoni? Kasi, zo—zodiak, ebandaka, eloko ya liboso na zodiak, ndenge nasosoli, ezali mongondo; oyo ya nsuka na zodiak, ezali Leo Nkosi. Ezali Boyei ya liboso ya Klisto, na nzela na mongondo; Boyei ya mibale, ezali Nkosi ya libota na Yuda. Bomoni? bongongo tozali na eleko ya cancer, mpe, lisusu, oyo elandi na zodiak.

¹²⁹ Sikawa, tomoni ete ezali na mosusu oyo ekomamaki, to mosusu etiamaki, mpe ezalaki ba-piramíde. Bomonaki na ba-piramíde, ndenge ebandaki, monene na nsé, lokola ngomba, ya mabanga makasi, ezalaki komata kino na sóngé? Kasi batikálá kotia naino libanga ya motó likoló ya piramíde yango te, piramíde monene kuna na Ejipito. Bimisa. . . . Soko ozali na lokasa ya dollar moko na libenga na yo, bimisa lokasa ya dollar moko mpe tala yango. Okomona awa, elembo ya Amerika na ngámbo moko, mpe na ngámbo mosusu, ezali na piramíde, na nsé. Mpe likoló na piramíde, libanga ya motó, kasi ezali liso moko ya monene. Babengaka yango, na nsé ya piramíde yango: “Elembo monene.” Mpo na nini mpongo ya Amerika ezali elembo monene te? Yango nde elembo ya Nzambe. Bómikanisela, tozaláká koyemba mwa loyembo moko:

Na nzela mobimba oyo ememaka na efandelo
ya solo ya molimo,
Liso moko ezali kotala yo;
Lokolo moko na moko obwakaka, Liso monene
oyo efungwámá,
Liso moko ezali kotala yo.

Ya solo. Bómikanisela, ntango tozaláká kosala mwa—mwa yubile? Tozalaki koloba:

Soko oyibi, obubi mpe okosi, kasi na losambo
otatoli,
Liso moko ezali kotala yo.

¹³⁰ Sikawa, elembo monene yango. Sikawa, toyebi, mpe ngai nasosolaka yango te, emekeli ya piramíde yango. Kasi nautaki koyebisa bino, na oyo euti koleka, na moko na malakisi oyo ekoteyama, mpo bómona ete nyonso ezali kotambola malamú, elongo.

¹³¹ Sikawa, piramíde ezalaki kobanda, kotalisa Lingomba, monene na nsé. Mpe wana ezali komata mpembeni na sóngé, ebandi kokóma, moke-moke, lokola mo—molongósi.

¹³² Sikawa, tomoni ete ekómi mpenza na likoló, na sǒngé, mpe batikálá kosilisa yango te. Mpo na nini? Mpo na nini? Nazali komituna mpo na nini! Mpo Biblia elobi ete Libanga ya motó eboyamaki. Baboyamaki.

¹³³ Sikawa botala, eleko ya lingomba... Bóyoka na bokebi sikoyo. Bózanga oyo te. Eleko ya lingomba euti longwa na ebandeli ya Reforme, Luther, kalakala, ntango mabanga ya moboko etiamaki, oyo ezali mateyo ya bantóma. Bongo, tomoni, wana ntango ezalaki kopusana, longwa na eleko moko kino na mosusu, Lingomba ebandaki kokóma moke koleka ntango nyonso, kino ntango ekómaki lokola... Luther ateyaki kolongisama. Na nsima, kaka kozala, koyambola ete ozali Moklisto bakokaki koboma yo, ezalaki mikolo ya bobomami, baoyo babomami.

¹³⁴ Sikawa tomoni ete na eleko ya Wesley, ozalaki motúntuki soko oyámboli Klisto na eleko wana, Metodiste ya sika wana. Bato babimaki, awa, ntango Wesley ayaki awa, mpe Asbury, bazalaki kosala mayangani awa na Amerika, natángaki lisolo na bango, na esika oyo bazalaki kosala yango na biteyelo. Mangomba na bango, awa, baboyaki koyamba bango. Sukasuka bakómaki na esika oyo Molimo Mosanto ezalaki kokita likoló na bango, bongo bakokweya na nsé, mpe bazalaki kosopela bango mai, kopepa bango mopepe, bakanisaki ete basézwaki. Ngai moko nasílá kokende na mayangani na bango, na mibu na ngai ntuku mitano. Namóná bango kokwea na nsé na nguya ya Molimo Mosanto ndenge wana, mpe bazalaki kobwakela bango mai na elongi, mpe nyonso wana, ba-Methodisiti ya nsómi ya kala, eleki mibu mingi. Wana ezalaki monyoko.

¹³⁵ Sikawa, bongo, ntango eleko yango esilaki, eleko ya Wesley, eleko ya ba-Pantecotiste eyaki, ná libatisi ya Molimo Mosanto. Bomoni, ezali kozua lolenge, ntango nyonso. Sikoyo bómikanisela, Libanga ya motó wana etiamaki naino likoló na yango te. Mpo na nini? Batongaki Lingomba ndenge moko mpenza, to pirámide na lolenge ete éyamba Libanga ya motó, kasi Libanga ya motó etikálá koya te. Oh, bomoni esika nini nakómi, boye te!

¹³⁶ Sikawa, lotomo longwa Luther kino nsuka ya Pantekote, na kati ya mwa bato moke wana likoló awa... Yango wana Pole ekómi penepene na kokufa, na eleko oyo, kuna, na manáka, na liyemi wana. Ezali eleko ya pantekote, pantekotiste; ba—ba-denominations ya ba-Pantekotiste te, mpo basili kosala mpenza lokola Laodikia. Bazali bato ya Laodikia. Basalaki lokola Banikolaiti, bakómi ebongiseli.

Kasi Lingomba ya solo, na mokili mobimba, esili kokoma mpenza na lolenge, na esika oyo lotomo moko eyei katikati na Yango, ezali mpenza lokola lotomo ya Yesu Klisto. Sikawa, bazali na eloko nini? Babongisi likambo yango. Sikawa,

eloko nini ekolanda? Libanga oyo eboyamaki, ya piramíde, elongwaki na ngomba kozanga nini? Kozanga lisungi ya maboko. Nzambe atindaki Yango. Bomoni yango? [Losambo balobi: “Amen.”—Mok.] Oyo aboyamaki, Libanga oyo eboyamaki, ekómi motó ya Oyo; ekómi motó, libanga ya motó. Mpe kaka Moto oyo babóyaki, na eleko ya Mabota, ezali Klisto. Mpe Klisto alongolamaki te mpo na kotiyama awa lokola mokitani, to mwana na Nzambe, to moto monene moko ya lokumu kati na lingomba. Azali Molimo Mosanto. Mpe motó ya piramíde ekokóma Klisto oyo azali koya. Bomoni yango? [“Amen.”]

¹³⁷ Sikawa, mpo basili kozua lolenge, (Bomoni ete nayemaki oyo awa na lolenge ya piramíde, kosekwa ya basantu?) ekomisi botamboli yango kati na Nkembo. Bososoli yango sikoyo? [Losambo balobi: “Amen.”—Mok.] Klisto, Libanga ya motó, Libanga oyo eboyamaki, Liso oyo emonaka nyonso, ezali koya mpenza ndenge Biblia elobaki. Mpe Danyele alobaki ete azalaki kotala eleko ya Mabota oyo, kino Libanga oyo elongwaki na ngomba, esalemaki ná maboko ya moto moko te. Batikálá kotia naino libanga na motó ya piramíde yango te. Elongolamaki na maboko ya moto te. Loboko ya Nzambe nde elongolaki Libanga yango. Bomoni yango? [“Amen.”] Mpe Esalaki nini? Ebetaki elilingi yango na makaká mpenza, mpe ebukaki yango biteni-biteni, enikaki yango lokola mputulú. Aleluya! Likambo nini esalemaki na ntango yango, na boyei ya Libanga yango? Lingomba emataki na Nkembo, na Konétolama, mpo esukisaki eleko ya Mabota. Nzambe nde asukisaki yango, boyei ya Libanga yango.

¹³⁸ Bato mosusu bazaláká koya awa na losambo, mobali moko ya mokuse, ná mwasi na ye. Bakozua Biblia, kotia Yango na esika moko boye; mpe bakokóba koyemba:

Oh, nazali koluka Libanga wana, oyo ezalaki
kobaluka na Babele,
Kobaluka na Babele... (Azalaki kotambola,
mpo na koluka Yango, bomoni.)
Koluka Libanga wana, oyo eyaki kobaluka
kino na Babele.

¹³⁹ Tala Ye wana! Klisto nde Libanga yango. Abotamaki na moto te. Abótamaki na Nzambe. Azali koya kozua Lingomba oyo ebótámá mbala ya mibale, na Molimo na Nzambe, mpamba te, makasi ya Libanga ya motó yango ezali na kati ya Lingomba mobimba, lokola emá.

¹⁴⁰ Nazali koyeba lisusu ntango nazalaki awa, kotala masíni ya konika wana, na ntango wana, epai bazalaki kopapa biloko nyonso wana. Mpe biteni ya mabende nyonso wana ezalaki kuna, mpe bakómbaki yango kuna. Libanga monene wana eyaki mpe elokotaki yango, libanga monene ya emá, elokotaki nyonso wana, mpo ebendamaki na emá yango.

Tosengeli kobendama lokola emá na Libanga ya motó wana. Libanga ya motó yango ezali Molimo Mosanto, Klisto. Mpe moko na moko na biso, azali na kobendama wana ya Molimo Mosanto. Ntango Libanga yango ekobeta elilingi yango, Lingomba ekokima epai na Yango, mpo na kozonga na Nkembo. Akonétolama, na Konétolama ya basantu, ntango Akokende na mokolo wana.

¹⁴¹ Sikawa, bótala awa. Tomoni ete Bayuda bazali sikawa kozonga, ezali pene na mibu ntuku minei, pene na ntango yango moko oyo ezuaki bango mpo na kokóma kino na kobebisama ya tempelo. Ezuaki bango pene na mibu ntuku minei mpo bázonga, liboso bátonga lisusu tempelo mosusu. Bomoni, tokómi mpenza na nsuka ya mobembo. Ee, soko bato ya Mabota . . .

¹⁴² Sikawa tózua . . . Tozali komona Lingomba, boyei ya Libanga. Tózua eleko ya nsuka. Toyekolaki yango. Tomoni sikawa. Nakanisi nazali na makambo mosusu awa, oyo nakomaki na ntina na yango. Tótala naino, mwa moke. “Mpe mokonzi oyo akoya, elingi koloba motemeli-na-Klisto, akosala boyokani ná Bayuda.” Mpe na Danyele 7 . . . to—to 9:27. “Na katikati ya mpóso, mibu misato na ndambo, nyama akosala boyokani na ye . . .” Na—nalingi kokóma na oyo wana, nsima na mwa ngonga, na boyokani yango. Tolingi kotika . . . nalingi kobanda awa sikawa.

¹⁴³ Moko na moko na bileko na Mabota etalisami polele na kozanga kokweya, ya motindami na yango, ya nsango na ye, mpe ya oyo esengelaki kokóma.

Eleko oyo *awa* ezalaki eleko ya nkembo.

Na eleko oyo elandaki, elobamaki ete mateyo moko ekoya, oyo ekobengama, to eloko moko ekoya, ebengami “ma—maloba ya Banikolaiti.”

Nsima na yango, eloko elandaki, ekómaki mateyo.

Nsima na yango, libala ya . . . ná lingomba ya Banikolaiti, mpe minyoko ya basantu. Makambo nyonso ekómaki mpenza bongo.

Tokómi na oyo elandi, mwa Pole moke ebandi. “Ozali na mwa makasi, mpe ozali na nkombo ete ozali na bomoi, kasi osili kokufa. Lendisa oyo osili kozua, mpo náya kolongola etemelo na mwinda te.”

¹⁴⁴ Na bongo Wesley ayaki, nsima na yango, ná eleko na ye. Tomonaki mpenza oyo . . . Eleko ya Wesley, bazalaki kobenga yango ndenge nini? Filadelfia. Eleko—eleko ya monene koleka, ya bolingo, oyo tosilá kozua, eleko ya Filadelfia, ezalaki mpenza na ntango ya John Wesley.

Ntango alekaki, Pantekote eyaki, ezalaki mwa molunge.

Na nsima, tozongi mpe tomoni lolenge ya Nsango oyo ekoya epai na ba-Pantekotiste, na nsuka.

Bómikanisela, moko na moko azalaki koya na nsuka ya eleko. Santu Paulo ayaki na nsuka. Bamosusu bayaki na nsuka, Santu Irené na bamosusu nyonso. Eleko moko ezalaki kokoba kino na oyo ya mosusu, bazalaki kolandanaka, mpe moko akozua yango mpe akokóba na yango kino na eleko oyo elandi. Bomoni?

¹⁴⁵ Sikawa, tomoni ete, na eleko oyo, monzoto moko ezali, ndenge tozali na yango kuna. Tozali na monzoto moko, motindami. Tozali na moto moko, Nsango moko—moko, oyo ezali kosakolama na eleko oyo; bamoko bakoboya Yango; bamosusu bakoyamba Yango. Mpe motindami ya eleko oyo asengelaki koya na nguya ya Eliya. Ya solo. Mpe asengelaki “Kozongisa Kondima ya bana epai ya batata, kozongisa litiká ya Pantekote, baoyo batikali, na Kondima ya solo ya bantóma.”

¹⁴⁶ Sikawa, Kondima ya solo ya bantóma, soko bolingi kotanga Yango na Buku ya Misala, bokomona ete etikálá kosalelma ata mbala moko te, moto moko abatisamaki “na nkombo ya ‘Tata, Mwana, Molimo Mosanto.’” Etikálá kozala na moko te na bango oyo atikálá komwangiselama mai. Makambo oyo tozali komona kosalema lelo, oyo ebengami Pantekote, etikálá kosalema na eleko wana te. Bazalaki na kotalisama ya solo, mpe Molimo ya Nzambe katikati na bango, oyo ezalaki na kozanga kokweya, Mwana na Nzambe kosáláka mosala elongo na bango.

Moto oyo asengelaki koya, Nsango oyo, nde, oyo esengelaki koya, oyo asengelaki koya, asengelaki kozala lokola Eliya. Eliya asengelaki koya mbala misato.

Sikawa, bokoloba ete: “Yoane Mobatisi nde moto yango.” Soko botali malamú, Yesu alobaki ete Yoane Mobatisi azalaki motindami ya Malaki 3, ya Malaki 4 te. “Tala, Natindi motindami na Ngai liboso na elongi na Ngai.” Nakanisi na Matai 11:6, na kati kuna nde bokomona yango, na Matai mokapo ya 11.

¹⁴⁷ Sikawa, kasi na mikolo ya nsuka oyo, Molimo ya Eliya esengeli koya katikati na bato, mpe asengeli kosala likambo moko oyo bango basalaki kala kuna. Lolenge na Ye ekozala motindo yango moko, lolenge ya Lingomba. Lolenge ya—ya moto yango ekozala mpenza motindo yango moko. Mpe Nsango yango ekoteyama, komeka... Akoyinama, na bato. Akoyina basi, baoyo ya bomoi mbindo, nde, baoyo ya mabe. Akolinga lisobe; moto na bongobongo, na komitungisa ntango nyonso, ndenge Eliya azalaki, mpe ndenge Yoane azalaki. Mpe tosili komona makambo nyonso oyo kokokisama. Soko toyambi Nsango, tozali komona Klisto aboyami. Osengeli kokota na moko na bibongiseli oyo, soki te, okokóma epai na bango te. Boye, Ye, Abwakisami libanda. Bomoni? Klisto akoki kosala katikati na bango te.

“Ozali nini?”

“Moklisto.”

“Ozalaka na denomination nini?”

“Nazalaka na moko na yango te.”

“Tokoki kozua yo na mosala te.”

¹⁴⁸ Bomoni, Aboyami. Ya solo! Bomoni, Aboyami! Eliya mpe aboyamaki, Yoane mpe aboyamaki. Kasi, eloko nini, likambo yango etungisaki bango? Etungisaki nsango na bango? Balobaki: “Oh, bino bato na mitó makasi.” Balobelaki bango polele mpenza. Basalaki maseki te. Bakendeki mpenza liboso. Mpe Nsango ya Nzambe ekokoba kokende liboso, ata moto nani alobi nini, bomoni, kino na nsuka, mpe ntango. . . oyo ekánámá ekolobama polele mpenza. Tokómi na nsuka.

¹⁴⁹ Sikawa, tomikomeli sikawa, na mibu ntuku minei, oyo bazali kozonga, kobanda na Etumba ya Liboso ya Mokili Mobimba, mpe Bayuda basili kozonga na mabelé na bango moko. Nzambe atikálá kosala ná Yisraele te, ntango nyonso oyo bazalaki libanda na mabelé na bango moko.

¹⁵⁰ Sikawa, bomikanisela, ntango Bayuda bazalaki kozonga, Bayuda oyo bazalaki kouta na bikólo mosusu, mpe zulunále *Look* elobaki likambo yango. Natángaki eteni ya zulunále moko, zulunále moko ya basámbeli, ete ntango ba . . . Ba-mpépo yango ekitaki kuna mpo na kozua Bayuda oyo bazalaki mosika, na Iran. Nayebi te bisika nyonso oyo bazalaki, bapalanganaki.

Sikawa, bango nde Bayuda ya solo, baoyo batikálá kozua libaku malamumu moko te. Sikawa, ndeko, bango nde mokama na ntuku minei na minei. Ntango tokokóma na Emoniseli 11, bokomona bango. Alobaki: “Mabota ezali zomi na mibale (ya Gada), mabota zomi na mibale (ya Asele), mabota zomi na mibale (ya Lubene), mabota zomi na mibale. . .” Mpe bango nyonso batelemaki wapi? Likoló na Ngomba Sinai. Bayuda, bazongaki na mabelé na bango, kuna nde bazalaki. Bazala baoyo bazalaki etonga ya babúbi oyo ya Wall Street te. Te, misié. Ezalaki nde Bayuda oyo ya solo.

¹⁵¹ Mpe ntango mobange ya lábi oyo atelemaki wana mpe amonaki mpepo yango kokita, Bayuda wana. Botángaki yango na zulunále. Bazalaki naino kotimola mabelé na bitimantoto ya mabaya. Mpe ntango bamonaki eloko yango kokita kuna, balingaki kopusana mpembeni na yango te. Mobange ya lábi yango atelemaki wana mpe alobaki: “Bómikanisela, mosakoli na biso alobaki: ‘Ntango tokozonga na mabelé na biso, tokozongisama na mapapú ya mpongo.’”

Bikólo ezali kopanzana, Yisraele ezali kolamuka,
Bilembo oyo basakoli basakolaki.

Tokomi kutu penena kokota na mpóso ya nsambo wana for na bango.

¹⁵² Nakanisi, ngai moko nazalaki wana, ntango Ndeko Pethrus atindaki ba-Kondimana mike wana, mpe batángaki yango.

Balobaki: “Malamu, soko oyo nde Masiya, tó—tómona Ye kosala elembo ya Mosakoli; soko Akúfá te, Azali na bomoi.” Balobaki: “Asekwaki; Azali na bomoi kati na Lingomba na Ye; tómona Ye kosala elembo ya Mosakoli, mpe tokondimela Ye.” Bayuda bandimaka ntango nyonso. . . Bayebaki ete Masiya asengelaki kozala Mosakoli.

¹⁵³ Mpe ntango nazalaki kuna, epai ya Ndeko Arganbright, mokolo wana, na esika wana, Bayuda yango mpe bazalaki wana, balobaki: “Yaka nde epai na biso, na libota na biso.”

¹⁵⁴ Nalobaki: “Ya solo, nakosepela koya kuna.” Nazuaki mokano moko, mbangu-mbangu mpenza.

¹⁵⁵ Nakómaki na Caire, na Ejipito. Mokolo wana na mpokwa, ntango namonaki mpepo kuna na Caire, ekaniselaki ngai. Boye, ntango tokómaki kuna, nazalaki na tiké na ngai mpo na kokende na Yisraele, balingaki kokutana na ngai kuna. Nalobáki: “Bókende kosangisa mwa bankóto ya bakambi. Bómema bango na mpepo, na esika moko, tokomona soko Azali Mosakoli kino lelo to te. Amen. Malamu, tómona eloko nini Akosala.” Oh, etikalaki moke básimba yango. Yango nde eloko oyo balingaki. Soko bakokaki komóna yango, balingaki kondima yango.

¹⁵⁶ Boye nasalaki nini? Nakómaki kuna, na Caire, mpe nabandaki kokende kuna. Nasilaki kozua tiké na ngai; etikalaki minúti pene ntuku mibale liboso bábenga. Eloko moko elobaki: “Sikawa te. Kopo ya masumu na nko, ya Mabota, etondi naino te. Masumu ya ba-Amola efulukaki naino te. Zala mosika na yango!” Nakanisaki ntango mosusu ezalaki kaka mabanzo na ngai, mpe nakendeke na nsima ya ndako ya mpepo mpe nasambelaki. Alobaki: “Zala libanda na kuna sikawa.” Na bongo, nazuaki tiké na ngai mpe nakendeke na esika mosusu. Nakendeke kuna te, mpo ngonga ekoki naino te.

¹⁵⁷ Sikawa, ntango nini Nzambe akopesa nzela na Bayuda wana, mpo na kobanda lisusu kosala ná bango, nakoki koyebisa bino yango te. Nayebi te. Moto moko te ayebi yango. Kasi, bóyoka, soko Yisraele esili kozonga na mabelé na bango, makambo nyonso ebelemi. Mabanga nyonso elokotami, mpe banzela ya mai, ba-mai, mpe nyonso oyo Nzambe alakaki. Bamonaki mabulu ya mai ná biloko mosusu kuna, mpe mikelé minene ya mai, ete ezali esika ya kitoko koleka, oyo bomóná naino te. Bazali na engumba moko oyo etongami kuna. Bazali na banzela ya mai. Bazali na mabelé ya malamú koleka na mokili mobimba, kuna. Mpe tomoni ete, na kati ya Mbu Ekufá, ezali na ba-produits chimiques mingi koleka, oyo ekoki mpenza, mpo na kosomba mokili mobimba. Bomoni?

¹⁵⁸ Nyonso ekwelá bango na loboko. Basalaki yango ndenge nini? Mpo motema ya Hitler eyeisamaki makasi, motema ya Mussolini eyeisamaki makasi, kaka ndenge motema ya Falo eyeisamaki makasi, mpe bazongisaki bango na makasi na mabelé

wana. Mpe esali mibu ntuku minei oyo bazali kozonga na mabelé yango. Sikawa bazali kuna, kozeláká.

¹⁵⁹ Lingomba ya Mabota ezali na Laodikia, na nsuka ya Eleko ya Laodikia. Soki. . . Bayuda bazali na mabelé na bango, basili kokóma kuna. Mpe kotomboka ya Mabota esili kosalema. Mpe tozali na Tata-Mokonzi ya ekolo lokola oyo tozali na ye. Tozali na ekólo oyo ekabwani lokola oyo tozali na yango. Tozali na ba-bombe atomiki oyo etiami na bibómbelo. Tozali na losambo oyo ezali móto te mpio te. Tozali na Lingomba, na bato, oyo basangani elongo. Tozali na lotómo oyo ekokani na oyo ya Yesu Klisto, mpo na koyamba Libanga yango, ntango Ekoya. Likambo nini etikali? Ekoki kosalema ata na minúti nini. Ezali na eloko mosusu te oyo etikali. Tokómi na ntango ya nsuka. Oh, nkembo! Nayebi te soko nakokoka kolobela yubile wana, to te, kasi nalingi—nalingi kopesa bino eteni na yango, ata bongo.

¹⁶⁰ Bóyoka, bo. . .? Bato boni bakoki komona sikawa? Bozomona esika oyo Makomi ezotalisa polele ete mpóso ntuku nsambo ezalaki mibu ntuku minei na libwa? [Losambo balobi: “Amen.”—Mok.] Bomoni esika oyo mpóso ntuku motoba na mibale ezalaki mibu nkama minei na ntuku misato na minei? Bomoni esika oyo mpó—mpóso ntuku motoba na libwa, na bango, ezalaki—ezalaki—ezalaki. . .? Ezalaki nini? Nkama mwambe na. . . Mibu nkama minei na—na ntuku mwambe na misato. Mibu nkama minei na ntuku mwambe na misato, kino ntango oyo. Bomoni esika nini Mokonzi alongolamaki? Bomoni, esemgeli kozua mibu ntuku minei mpo Bayuda yango, sukasuka, bákóma na esika na bango, esika oyo Nzambe alobaki.

¹⁶¹ Bótala awa, esika oyo eleko ya Mabota elekaki na makambo nyonso oyo tolobaki ete ekosala; esika oyo, ezali te oyo *biso* tolobaki ete ekosala; ezali oyo Biblia elobaki ete ekosala. Oyo Biblia elobaki ete ekosala, esili kokokisama kino na eleko oyo ya nsuka; mpe esili kosala mibu ntuku minei oyo Bayuda bazali kozonga awa, bazali komiléngela mpo Nzambe ásala mpenza makambo oyo Asálaki awa. Babimaki ndenge wana, mpe bazongaki ndenge wana. Yisraele asili kozonga na mabelé na ye.

¹⁶² Sikawa, Nzambe akobanda mpóso na bango ya nsuka ntango nini? Ntango nini? Ekoki kosalema lelo. Ekoki kozala liboso moi élálá na mpokwa ya lelo. Nzambe akotatola yango. Ntango nini ekosalema, nayebi te. Nazomituna. Kasi nalingi koloba likambo moko awa, sikoyo, na miniti moke, mpe nayebi te soko bokondima yango to te. Kasi na—na—nasengeli koloba yango, ata bongo, nandimi.

¹⁶³ Tozali na mabelé na biso. Bayuda bazali na mabelé na bango. Tokómi na nsuka ya eleko, tomilengeli mpo na Konétolama. Konétolama eyei, Lingomba emati, tonétolami mpo na kokutana na Ye na mipepe. Bisó nyonso toyebi yango. Libanga oyo elongwaki na ngomba, elengelami mpo na koya ata na ntango

nini. Mpe ntango Ekoya, Ekosala nini? Ekosukisa eleko ya Mabota. Ekosila nyonso nye, mpe Nzambe akotika mpenza kosála ná bango. “Tika ete moto na mbindo átikala mbindo naino; tika ete moto oyo azali mosantu átikala mosantu naino.” Bomoni? Akosala nini na ntango yango? Akozua Lingomba na Ye, baoyo batóndisami na Molimo Mosanto.

¹⁶⁴ Banani yango nde bazali na “mbindo”? Ezali báseka oyo baláli ná baoyo bakoya mpo na kosambisama, mosika, *awa*. Tokotia yango na etanda mosusu, ntango tokobakisa oyo elandi, ntango bakoya na Kosambisama ya Ngbende Mpembe, mpo basikolami basengeli kosambisa bango. Paulo ayebisaki biso ete tófúndanaka na esambiselo te, mpo basantu nde bakosambisa mokili. Ya solo. Tokómi na ntango ya nsuka, *awa*, sikawa. Malamu.

¹⁶⁵ Mpe na katikati ya mpóso oyo. . . Sikawa, ntuku nsambo yango oyo. Sikawa, soko makambo oyo epesaki mpenza mibu nsambo, mpóso moko na moko, mpe tosili kozala na mpóso ntuku motoba na libwa, nsima na yango, tozali na eleko ya Mabota, mpe toyebi ete tokómi na nsuka ya eleko ya Mabota, na boye, mpóso moko etikali mpo na Bayuda. Boye te? Mpe wana esali mpenza mibu nsambo. Soko *oyo* ezalaki mibu nsambo, oyo *wana* ezali mibu nsambo, mpamba te Alobaki: “Mposo ntuku nsambo ekatamaki mpo na libota na yo.” Boye toyebi totikali na mibu nsambo mpo na Bayuda. Ezali solo? Sikawa bótala yango. Soko motuna ezali, nalingi koyeba yango. Bomoni?

¹⁶⁶ Sikawa, mpe na katikati ya mpóso yango, na katikati ya mpóso yango ya Bayuda; bomoni, oyo wana ezali mibu—mibu misato na ndambo; motemeli-na-Klisto, mokonzi, mokonzi oyo asengeli koya. Bómikanisela, auti na Roma, mokonzi oyo asengeli koya. Azali nani? Pápa. Mokonzi katikati na bato, oyo asengeli koya, Fálo moko akotelema, oyo ayebi Yosefe te.

¹⁶⁷ Sikawa, bino ba-Protestánt bokoloba: “Malamu, sikawa, ezali bongo.” Kasi bózela naino. Tomoni ete ba-Protestánt bazalaka na ebongiseli moko, basali likita ya mangomba, elílingí na nyama, mpe bazali kotambola elongo ná bango.

¹⁶⁸ Tomoni awa ete Bayuda babengami kokóta na kati ya likita yango, (iyo, mesié), mpe bandimi yango. Mpe Biblia elobi ete bandimaki. Mpe asali boyokani moko ná bango.

Na katikati ya mpóso ya ntuku nsambo, abuki boyokani, motemeli na Klisto abuki boyokani na ye ná Bayuda, “libota na yo.” Mpo na nini?

Totángi na Emoniseli 11, ete: “Nakotinda. . .” Ezali 11. Bozali kobelema na 19 sikawa. Ete Akotinda basakoli na Ye mibale, mpe bakosakola na ntango wana, na nsima, bakotombokela basakoli yango mpe bakoboma bango mpenza. Boye te? Mpe bibembe na bango ekotandama na balabala ya molimo oyo ebengami Sodomo ná Gomola, esika babomaki

Nkolo na biso, Yelusaleme. Ezali bongo? Mpe etikalaki wana mikolo misato, butu mpe moi. Mpe nsima na mikolo misato, butu mpe moi, molimo ya bomoi ekokota na kati na bango, mpe bakosekwa mpe bakokende kati na Nkembo. Eteni moko ya zomi ya engumba ekweaki na ntango yango. Boye te? Bomoni? Wana ezali nini? Na katikati ya mibu ntuku nsambo oyo eleki.

¹⁶⁹ Ntango Lingomba ekomata; nsima nde lisanga, báseka oyo balali, ba-Methodiste, ba-Batiste, ba-Presbiterien, na ba-Pantekotiste ya mpio te móto te, bango nyonso ná lisanga moko. Kutu, basili kosala ebongiseli na bango ya monene. Ntango bakosala yango, bakosala boyokani moko. Mpe, ee, sikawa, pápa ya sika oyo tozali na ye sikawa, alingi kokotisa bango nyonso na kati. Bokoki komona ndenge likambo yango ebandi komonana, boye te? Akosala lísukúlu moko mpe, mpe akokotisa bango nyonso na kati, mbala ya liboso na mibu nkama na nkama na nkama; na mibu nkóto moko, to mibale, etikálá kosálema te. Kasi sikawa, asengeli kokotisa bango nyonso na kati, elongo, mpe kosala lisanga moko, mpe na kati kuna Bayuda bakoyamba yango. Oh, la la! Nkembo! Aleluya! Masanzoli na Nzambe na biso, Oyo azali na bomoi libela na libela! Yango mpenza! Sikawa, ndeko, ezali mpenza pete, pete na lolenge ete mwana moke akoki komona yango. Lisanga yango ekosangisa Bayuda, ná ba-Protestant, ná ba-Katoliko.

Mpe, bómikanisela, basakoli mibale oyo bakosala nini ntango bakoya?

¹⁷⁰ Nyama oyo, mokonzi oyo akopanza nguya ya libota ya bulee, akosala nini? Akobuka boyokani na ye ná bango. Nsima na mibu misato na ndambo, akobengana bango. Sikawa, bato bakanisaka ete ezali communisme. Ezali kaka mpo bo . . . Molimo na Nzambe esali naino ná bino te. Ezali communisme te; ezali eyamba. Biblia elobi: “Ekozala mpenza pene mingi na lolenge ete ekopengwisa ata Baponami, soko nde ekokoka.” Yesu alobaki bongo. Bomoni, tokómi na nsuka.

¹⁷¹ Sikawa, basakoli mibale oyo, bakosala nini? Mose na Eliya nde bakokota na mosala. Bakotalisa na Bayuda wana libunga na bango. Mpe uta na etonga ya Bayuda wana, baoyo bazali kuna sikawa, mpo na kokokisa mokama na ntuku minei na minei, Nzambe akobenga na nzela na basakoli oyo. Ezali nini? Molimo ya Eliya, kouta na Lingomba ya Mabota oyo, ekokoba kino na lingomba ya Bayuda wana, ekokende kuna mpe ekobenga; Mose elongo ná ye. Aleluya! Bomoni yango? Mpe akoteya Nsango yango moko, oyo ya Pantekote, epai na Bayuda, ete baboyaki Masiya. Amen! Bomoni yango? Ekozala Nsango yango moko, oyo ya Pantekote, nde Bayuda oyo bakoteya bango. Mpe bakoyina Bayuda yango mingi mpenza na lolenge ete bakoboma bango. Mpe bayinamaki na bikólo nyonso.

Mpe, na katikati ya mpóso, lokola bazuaki mokama na ntuku minei na minei ya bato minene ya nguya . . . Bazalaki na Molimo Mosanto. Mpe, ndeko, na oyo etali bikamwa, basalaki yango. Batelemisaki likoló, mpe mbula ebetaki te na mikolo ya lisakoli na bango; babetaki mokili na bitúmbu, mbala nyonso oyo balingaki. Bapesaki bitúmbu mpe makambo nyonso mosusu. Bakotungisa Baroma wana makasi mpenza. Kasi, sukasuka, bakobomama. Nzambe na biso azali Nzambe ya nsómo, soko Asiliki. Kasi bómikanisela, oyo wana ekosalema na mpóso ya ntuku nsambo, wana Lingomba ekozala na Nkembo, amen, wana Elambo ya Libala ezali kosalema. Iyo!

¹⁷² Sikawa bótala. Na esika wana nde tomonaki Ye-mwasi kozonga na Tempelo ya Mbula nkóto, awa, na nsuka ya eleko ya Bayuda, “mopakolami.” Tala Ye oyo koya, kotamboláká likoló na mpunda mpembe; baoyo balandaki Ye bazalaki likoló na mpunda mpembe. *Mpunda*, “ba-nguya.” Alataki mpembe; makila, to, elamba epolisámá na makila; likoló na Ye, bakomá: “Liloba na Nzambe.” Ayei lokola Molongi na nguya, iyo, mesié, mpo na kobandisa Millennium, kokota na kati ya Tempelo. Nkembo! Kuna nde Akokutana ná mokama na ntuku minei na minei wana, sikawa, nsima na mpóso ya ntuku nsambo awa.

¹⁷³ Mpóso ya ntuku nsambo, oyo ezali kosalema na ntango ya mpóso ya ntuku nsambo. Na kati ya misato, na katikati na yango, abuki yango, mpo abomi basakoli mibale ya pantekote wana, iyo misié, oyo bazali kobeta mokili.

Mpe, moninga, Alakeli lingomba yango mabe, mpe Atumbi ye ná móto. Mpe, na boye, a . . . Tomoni yango awa, ete ata basáli na mbu bazalaki mosika, balobaki: “Mawa, mawa, engumba monene wana ya Loma, ezánga kufa, akómi na nsuka na ye na ngonga moko.” Apanzanaki biteni-biteni. Nzambe ayebi ndenge ya kosala makambo. Mpe moko na Banje abwakaki miso, mpe alobaki: “Na bongo, makila ya babomami nyonso ya Klisto ezuamaki kati na ye,” zambi na bokosi na ye, kobima awa, mpo na komibongisa, mpe kosala makambo mosusu nyonso wana, mpe koyeisa mbindo na losambo, mpe akotisaki makambo yango kuna, mpe abomaki baoyo bamekaki kotelema mpo na Yango mpe komeka kobimisa bango.

¹⁷⁴ Nkembo! Oh, na—nayebi te. Na—na—nayoki mposa ya kosala mobembo. Bomoni? Bozali na esengo mpo na Pole ya Mwana, kotamboláká kati na Pole ya Mwana! Tokómi wapi, ndeko? Na ngonga ya nsuka! Ekoki kosalema ata na ntango nini. Tokómi wana!

¹⁷⁵ Nsa—Nsango esili kosakolama na lingomba ya nsuka, lingomba oyo eboyaki Klisto na yango. Bayuda bazali na mabelé na bango, ekokisi mwa ntango, mibu ntuku minei. Engumba ya sika esili kotongama. Bazali kozela nini? Masiya oyo azoya. Ekosalema na ntango nini? Nayebi te. Ntango Libanga wana

ekobeta elilingi yango *awa*, Asili kokende; ekosila nye, na ntango wana.

176 Sikawa bótala awa. Na katikati ya mpóso, mikolo misato na ndambo . . . mibu misato na ndambo, nde, abuki boyokani mpe apekisi ete mbeka mpe moboma . . . oyo bakosila kozongisa.

Mpamba te, bakozone mpenza kuna mpe bakoloba: “Sikawa, tala, bino nyonso bozali mangomba. Bokoki koyambama na kati ya elilingi na nyama. Tokozala na boyokani. Tokolongola communisme. Tokolongola mpenza communisme mobimba.” Bomoni? Mpe bakoki kosala yango. Bomoni? Mpe bakosala yango.

177 Kasi sikawa bótala malamumu. Kofandisa, kofandisa likambo oyo, losambo ná mbeka ya mokolo na mokolo ekozonga na engumba ntango tempelo ekotongama lisusu. Mpe mokonzi oyo akoya na katikati ya mpóso oyo, akobuka boyokani na ye, mpe akosukisa mbeka. Elobami ete: “Akopanza, kopanza yango.” Mpe eloko oyo akosala, mpe ekoumela kino na nsuka.

178 Mpe bótala:

. . . *kopalanganisama mingi ya mbindo mpo na kobebisa . . .*

“Kopalanganisama ya mbindo.” *Mbindo* ezali nini? “Bosoto.” Bomoni? “Koyeisa libebi,” ezali nini? “Kosukisa.” Kopalanganisama mingi ya *oyo*, mpo na kosukisa likambo oyo *wana*. Bomoni? Kopalanganisama mingi ya nguya ya Roma, kolonga báseka nyonso oyo baláli, Bayuda mpe nyonso. “Tokozala Baroma biso nyonso to tokozala eloko moko te.” Akobuka boyokani na ye na katikati ya mpóso.

179 “Kopalanganisama mingi ya mbindo.” Soko ezalaki mbindo na ntango ya Yesu, ntango Roma eyaki kuna ná nsango na bango ya lokuta, ekozala lisusu Roma, nde ekozala lisusu mbindo mpo na lingomba.

. . . mpo na *libebi*, mpe ekokoba kino na *bosukisi nye . . .*

Akosala nini? Akokoba bongo kino na bosukisi nye, elingi koloba, na nsuka.

180 Sikawa, Bayuda, ná Boroma, ná Bo-protestánt (elingi koloba báseka oyo baláli), bakomikembisa elongo na lolenge ya lisanga ya mangomba. Ekozala lolenge oyo Yesu alobaki na Matai 24, mpe na Emoniseli 13:14.

Tózua Emoniseli 13:14, mpo tómona yango. Natiaki yango elembo awa, mpo tómona yango, 13:14. Malamu, misié.

Mpe azimbisaki bafandi na mokili na nzela ya bikamwa yango oyo azuaki nguya ya kosala (ya kosangisa mangomba oyo) na miso . . . alobaki . . . na miso na nyama; koloba epai na bafandi na mokili, ete

básala elilingi mpo na nyama oyo azokaki mpota na kufa na mopanga kasi ebikaki.

¹⁸¹ Sikawa, toyebi, na ntembe ata moke te, nani nyama yango azalaki, nguya wana oyo ezokaki mpota ya kufa, kasi ebikaki. Ezali ntango Roma ya bopakano ebomamaki, mpe Roma ya bopápa ezuaki esika na yango; ntango nguya ya bapakano ebomamaki, mpe nguya ya bopápa ezuaki esika na yango.

¹⁸² Sikawa, sikawa, Emoniseli 13:14. Yesu, na Matai 24, akebisaki bango mpo na yango. “Elilingi na nyama.”

¹⁸³ Paulo, na Batesaloniki ya Mibale mokapo ya 2, molongo ya 3 mpe ya 4. Tózua yango, mpo tómona Paulo, eloko nini alobi awa mpo na yango. Molimo Mosanto monene wana likoló na mosakoli monene oyo ya Nkolo, tótala lolenge alobaki mpo na yango, na ntango ya nsuka. Na Batesaloniki ya Mibale, mokapo ya 2, ekomami kuna. Malamu, misié. Kobanda na molongo ya 3, nandimi ezali yango. Malamu, tótanga sikawa. Bóyoka na bokebi, bino nyonso. Bato boni bandimaka ete Paulo atondaki na Molimo Mosanto? Amen. Bótala malamau awa.

Tika ete moto ájimbisa bino te ata na lolenge nini: mpo ete mokolo yango ekoya te, bobele kotomboka eyei naino liboso, . . .

Azali komeka kobimisa likambo yango na mitó na bango, ete Azoya mpenza na ntango wana. Alobaki: “Esengeli ete kotomboka eya, kotángwa mosika na Lingomba, liboso,” bomoni, esalemi na Eleko ya Laodikia oyo.

. . . mpe moto na lisumu amonisami, . . .

“Moto na lisumu,” kozanga kondima na Molimo Mosanto. Kozanga kondima émonisama.

. . . mwana na libebi;

Lokola Yuda azalaki, mobombi misolo ya lingomba.

Oyo akotemela mpe akomitombola likolo na biloko nyonso oyo bibiangami Nzambe, to eloko nini ya kosambela; kino ete ye, lokola Nzambe, akofanda na tempelo ya Nzambe, . . .

Ndeko, moto moko azali na mokili, libanda na Vatican, oyo asalaka bongo? Na esika nini?

¹⁸⁴ Sikawa, bózua awa, na Emoniseli 13, mpo na kotalisa bino ete moto yango afandi likoló na engumba moko. . . na kati ya engumba moko, mpe engumba yango ezali likoló—likoló na ngomba nsambo. Mpe motángo ya nyama yango ezali nkama motoba na ntuku motoba na motoba, ekomami na—na Latin. . . alifabé ya Baroma, ezali nkama motoba na ntuku motoba na motoba, ezali *VICARIVS FILII DEI*, elingi koloba “Na esika ya Mwana na Nzambe,” na ngbende ya pápa. Mpe kiti na ye, azali na mitole misato. Mpe natalaki mpenza motole yango, ezalaki

mpenza mosika na ngai te, lokola loboko na ngai ná elongi na ngai, lolenge wana, mpe—mpe namonaki motole ya pápa, ebongísáma kitoko, kuna na Vatican, ngai moko, natelemaki wana mpe natalaki yango, mpo nándimisama ete nayebi eloko nini nazalaki koloba. “Atelemelaka, ye moko likoló na nyonso oyo ebéngamaka Nzambe, bato nyonso ya bosanto. Ye nde mosanto oyo aleki bango nyonso; afandi na tempelo ya Nzambe, azali komitalisa ye moko ete ye azali Nzambe,” kolimbisáká masumu na mokili, mpe bongo na bongo, boyebi. Solo mpenza.

¹⁸⁵ Paulo alobaki: “Kotomboka yango esengeli koya liboso, ete mwana na libebi ámonisama.”

Bojali kokanisa te, ete, ntango nazalaki. . . elongo na bino, nayebisaki bino makambo oyo?

¹⁸⁶ Oh, nalingaki kosepela kofanda wana, koyoka Paulo koteya yango, Bino te? Hmm! Nalingaki kosepela mpenza koyoka ye! Oh, la la!

¹⁸⁷ Sikawa, akosala nini? “Elilingi na nyama.” Batesaloniki ya Mibale. Sikawa bóyoka. Bóyoka na bokebi sikawa, na bokébi mpenza. Lingomba ezalaki koyoka lokola koya ya pápa moko. Ezali nini? Nsuka ya eleko ya lingomba wana, Paulo. Bamonaki ete makambo ya Banikolaiti ezalaki komata; balingaki kokómisa moto moko mosanto, (na nini?) pápa. Makambo ya mokili ná bakonzi minene basilaki komikotisa na lingomba, mpe kobongola molongo ya kosambela. Paulo, ná Molimo Mosanto, asilaki kosósola likambo yango na Molimo. Mpe lingomba, ná bitóngá mpe bato na lokumu na yango, bato bapesami lokumu, mpe bongo na bongo, ete bamonaki ete eloko moko ezalaki koya. Mpe Molimo Mosanto ezalaki kokebisa bango na ntina na mikolo ya nsuka. Bozoyeba lisusu te ndenge Yesu alobelaki yango? Misala ya Banikolaiti, oyo, sukasuka ekómaki mateyo, bongo na nsima ekómaki ebongiseli! Bandeko, tozali kati na molili te, sikawa. Bómikanisela, bomoni. Tokómi wana.

¹⁸⁸ Misala ya Banikolaiti, ebongiseli oyo ebandaki kokota, bato minene ya lokumu, likoló na mangomba, mpe bongo na bongo, na nsima, basalaki lingomba Katoliko. Mpe Paulo alobaki ntango ya nsuka ekoki koya te, ntango ekoki koya te, kino kotomboka mosika na Kondima ya solosolo, ya Pantekote éya. Kondima ya pantekote ekolongolama, mpe bato na lokumu bakofandisama. Bakozala na moto moko oyo akozua esika ya Nzambe, akofanda na tempelo ya Nzambe, mpe akotemela, akomitombola likoló na bato nyonso ndenge wana. Mpe, ezali, bomoni, ezali nini? *Nikao*, “kolóngá bandimi.” Bomoni? “Nyonso oyo ebengami Nzambe; akofanda kati na tempelo na ye ya Nzambe, lokola Nzambe.” Paulo alobaki ete kotomboka ekoya liboso, na mikolo ya nsuka. Tokómi wana, wana mpenza sikawa, mpe tozali komona kotomboka yango, tozali komona lingomba kokende

mosika, mosika na Yango, mpe ezali kozonga mpenza na nsima. Tokómi na ntango ya nsuka. Malamu.

¹⁸⁹ Sikawa, soko mpóso ntuku motoba na libwa ekokisamaki malamu be, mpe Bayuda bazali na mabelé na bango sikawa, mpe eleko ya lingomba ya Mabota ekokani mpenza na ntango ya nsuka, na ntango ya Banikolaiti . . . to na ntango ya Laodikia; etikali ntango boni liboso na Boyei na Nkolo, nsuka ya makambo nyonso, nsuka ya eleko oyo, mpe Konétolama? Ntango Abandi mpóso ya ntuku nsambo wana, to mibu nsambo, Lingomba ekei.

¹⁹⁰ Bokoki komona yango, baninga? Bótombola loboko soko bokoki komona yango. Bomoni? Sikawa, tózala bana te. Tósakana lisusu te. Tokómi na ntango ya nsuka. Eloko moko elingi kosalema. Tokómi na nsuka. Tokómi wana.

¹⁹¹ Mpóso ntuku motoba na libwa ekokani malamu be; bokei ya Bayuda epesi malamu be; eleko ya lingomba epesi malamu be. Tokómi na ntango ya nsuka, ntango ya nsuka, eleko ya lingomba ya Laodikia, nsuka na yango. Batindami-minzoto nyonso bateyaki nsango na bango. Esili kosakolama. Tozokoba se kolobela yango. Esali mibu ntuku minei oyo Bayuda bazali kozonga. Bazali na kati ya mabelé na bango.

Eloko nini ekosalema na nsima? Boyei ya Libanga. Tokómi wana. Ekosalema na ntango nini? Nayebi te. Kasi, ndeko, mpo na ngai, nalingi komilengela. Nalingi ete bilamba na ngai nyonso elengelama.

¹⁹² Sikawa, totikali kaka na—kaka na miniti moke mpenza, mpe nakosepela ete bóyoka na kimia sikawa, mpo na miniti moko.

Ntango Abandi mpóso ya ntuku nsambo, to mibu nsambo, Lingomba esili kokende. Sikawa bóyoka. Nakoloba yango lisusu, nakozongela yango, mpo bóbosana yango te. Oyo nde Molimo Mosanto atiaki na ekomeli ngai wana nazalaki kokoma. Tozali na eleko ya Laodikia. Klisto azali koboyama na lingomba na Ye moko. Monzoto ya eleko oyo, Nsango, esakolami. Mpe Yisraele azali na mabelé na ye. Bomoni esika nini tokómi? Tokómi na nsuka.

Sikawa, kaka likambo moko to mibale.

¹⁹³ Nyonso oyo tozomona sikawa, ekosunga biso, na ngolu na Ye, wana tozali kosala makasi yo kopusana na bilembo Nsambo ya nsuka oyo. Bomoni esika oyo tolingaki kozanga yango? Kobanda Emoniseli 6:1 kino Emoniseli 19:21, tolingaki kozanga yango, zambi, bomoni, tolingaki komeka kosalela yango na nsima *kuna*, na eleko ya Mabota oyo; nzokande, bomoni, ezali na eleko *oyo*. Bomoni?

Sikawa, tosili kotalisa yango polele na Liloba na Nzambe, mpe na istwar, mpe na makambo nyonso, mpe na bilembo ya bantango, na mikolo, ete eloko mosusu etikali te. Tokómi na nsuka ya ntango ya Mabota. Eloko nini biso—eloko nini biso

tokosala na ntina na yango? Etali elimo na ngai mpe elimo na yo; etali bomoi na ngai mpe bomoi na yo; etali bomoi ya balingami na biso. Tobémbélisami ntango mingi koleka. Tozuaki makambo mingi koleka na pete. Ekozala malamu tóbanda kokende liboso. Ntango ekómi mosika koleka ndenge bozokanisa, bómikanisela kaka.

¹⁹⁴ Sikawa, liloba ya kobenda bokebi, soko bolingi kokoma yango. Bóyoka na bokebi, nasengi bino. Oyo ezali liloba na ngai ya nsuka, ekotikala moko; Natikali na mwa likambo moko ya moke awa, nsima na oyo, mwa eloko moko nakomaki, nalingi koloba yango. Sikawa bópema mwa moke, mpe bóyoka na bokebi, nakopesa bino eloko moko ya makasi, oyo ezali elongo na oyo. Bomoni?

Ezali ata na ntáká ya lotebú te kati na nsuka ya eleko oyo ná Boyei na Klisto. Nyonso, eloko mosusu etikali te. Yisraele azali na mabele na ye? Toyebi yango. [Losambo balobi: “Amen.”—Mok.] Tozali kati na Eleko ya Laodikia? [“Amen.”] Nsango ya eleko ya pantekote oyo esakolami, mpo na koluka koningisa bato mpe kozongisa bango na Lipamboli ya pantekote ya ebandeli? [“Amen.”] Motindami nyonso ayáka na kati ya eleko, kaka mpenza lolenge moko? [“Amen.”] Bikólo ezótemela bikólo? [“Amen.”] Bokono ya mabe? Nzala ekoti na mboka lelo, Lingomba ya solo ezali kotambola ba-kilometre nkama na nkama na mituka, mpo na koluka koyoka Liloba na Nzambe? [“Amen.”] “Bobebe mpo na lipa te, kasi mpo na koyoka Liloba na Nzambe.” Nzala eyei. Ezali bongo? [“Amen.”] Boye, tozali kobika mpenza na katikati na yango, awa mpenza sikawa. Bomoni esika nini tokómi? Tozali kozela Libanga yango.

¹⁹⁵ Liloba ya kobenda bokebi mpenza! Kobanda na ntango Nzambe apesaki elaka na Abraham . . . Bózanga oyo te. Kobanda na ntango Nzambe apesaki elaka na Abraham, Genese 12:3, kino ntango Klisto aboyamaki na mobu A.D. 33, na Bayuda; kokokana na Bagalatia 3:16 mpe 17, mpe kokokana na oyo ya Usher, oyo ya U-s-h-e-r, etangeli ntango ya Baebele oyo ya Usher; nguya na Nzambe ezalaki na Bayuda mibu nkóto na nkama libwa na ntuku mitano na minei. Nzambe asalaki na Bayuda na mibu nkóto na nkama libwa na ntuku mitano na minei, kokokana na etangeli ntango ya Bayuda, mpe kokokana na Bagalatia 3:16 mpe 17. Nazali na Makomi mingi mosusu, kasi napesi kaka wana.

Bongo, nsima na bango koboya Klisto, Abalukaki epai ya Mabota, kozua bato mpo na Nkombo na Ye. Bokolinga kozua Likomi moko mpo na yango, esika ekomami? Misala 15:14.

¹⁹⁶ Sikawa, kotanga ya ntango, tomoni ete totikali mpenza na (bóyoka) mibu zomi na nsambo, mpe tokozua kaka ntaká ya ntango moko oyo epesamelaki biso, wana Nzambe azali kosala na biso na nguya ya Molimo Mosanto, kobanda na mobu A.D. 33 kino 1977. Kaka ntaká ya ntango moko wana, ya mibu nkóto na

nkama libwa na ntuku mitano na minei, Nzambe azali kosala na biso ndenge Asalaki ná Bayuda. Bolobi nini na oyo wana!

¹⁹⁷ Sikawa, bókoma na buku na bino, mwa Likomi moko oyo nalingi kopesa bino. Lewitiko 25, kobanda na molongo ya 8. Nzambe azalaki kobenga yubile, nsima na mibu ntuku minei na libwa nyonso. Mobu ya ntuku mitano ezalaki yubile. Toyebi yango. Tososoli yango. Kobanda na yubile ya liboso, ya Lewitiko 25:8, na mobu 1977, ekozala yubile ya ntuku nsambo, esali mpenza mibu nkóto misato na nkama minei na ntuku misato. *Yubile* elakisi “Komata! Kokangolama!”

Oh, tozali kozela boyei ya Millennium wana,
Mokolo ya esengo,
Ntango Nkolo na biso, oyo apambolami, akoya
kozua Mwasi na Ye ya libala, oyo azali kozela
Ye;
Oh, mokili ezali konguluma, kolela mpo na
mokolo ya kokangolama wana,
Ntango Mobikisi na biso akozonga na mabelé
lisusu.

¹⁹⁸ Bososoli yango? [Losambo balobi: “Amen.”—Mok.] Nzambe asali na biso na motango ya ntango moko mpenza oyo Asalaki ná Bayuda. Kobanda ntango Apesaki Abraham elaka, kino ntango baboyaki Masiya na A.D. 33, ezalaki mibu nkóto na nkama libwa na ntuku mitano na minei. Sikawa, etikali mibu zomi na nsambo. Bisu tozui mibu nkóto na nkama libwa na ntuku mitano na mbuka. Totikali na mibu zomi na nsambo, liboso na mobu '77, ekozala yubile ya ntuku nsambo, kobanda na ebandeli ya bayubile. Mpe ekozala nini? Oh, ndeko! Tala malamuni mpenza sikawa. Kozanga yango te. Ekozala yubile ya komata ya Mwasi na libala ya Mabota, mpe ya bozongi ya Klisto epai ya Bayuda, ntango bakobima na boómbo. Amen! Bozali komona te? Longwa na mokili mobimba, basangani kuna mpo na mokolo yango. Oh, la la! Bomoni epai wapi tokómi? Toyebi te, ekoki kosalema na ntango nini. Tokómi na ntango ya nsuka.

¹⁹⁹ Sikawa bóyoka. Mpo na bino bato ya kala oyo bozali awa, na—na losambo, oyo boumeli awa, Nalingi ete bótala likambo moko. Natikálá koyeba likambo oyo te kino lobi loleki; nazuaki yango epai ya mokundoli bokala moko, Paul Boyd, nsima na yango. . . Mpe nalandelaki yango na kati ya Makomi, nazuaki mikolo mosusu oyo, awa, mpe bongo na bongo, mpe nazuaki yango, nalandeli yango, nalandelaki yango mpenza.

²⁰⁰ Sikawa, na mobu 1933, ntango tozalaki kosambela awa, na tempelo ya ba-Franc-macon, esika lingomba ya Klisto ekomi lelo, na ntongo ya sanza ya minei, liboso ná bima na ndako, Nazalaki kobulisa motuka na ngai (nazalaki na motuka ya model '33 mpe nazalaki kobulisa yango na mosala ya Nkolo.), mpe, na emononeli moko, namonaki ntango ya nsuka (Sikawa,

bótala ndenge oyo ezali kobenda bokebi, kala mpenza, ntango nazalaki naino elenge mwana mobali, mpe bokoki kokanisa ndenge motuka ya model 1933 ezalaki, sikawa, ndenge ezalaki komona.), mpe nakendeki kuna, na tempelo ya ba-Franc-maçon, esika, bamosusu kati na bino, bato ya kala awa, bozali koyeba lisusu, ekomami na lokasa moko ya kala, na ndako, nasilaki kobimisa yango, mpe etambolaki na mokili mobimba, bomoni, ezalaki na mobu 1933, mpe nalobaki liboso ésalema, ete likambo moko ya mawa ekokómela Etats Unis oyo, liboso, to, na mobu 1977. Bato boni bazoyeba lisusu ete nalobaki yango? Bótala maboko. Solo.

²⁰¹ Sikawa bótala malamumu, nalobaki liboso makambo nsambo oyo mazalaki naino ko . . . liboso na libebi monene oyo to likambo ya monene oyo ésalema awa na Etats Unis, likambo moko ya monene mpe ya nsomo.

Nalobaki, Sikawa bómikanisela, oyo ezalaki liboso ébanda, nalobaki ete tokokota na Etumba ya Mibale ya Mokili Mobimba. Bato boni bazomikanisela ete nalobaki yango? Bóloba: “Amen.” [Losambo balobi: “Amen.”—Mok.] Malamumu. Etumba ya Mibale ya Mokili Mobimba! Nalobaki: “Tata Mokonzi oyo azali sikawa . . .” Nakomaki likambo oyo uta na Makomi na ngai ya kala, oyo, na buku ya kala, lobi, ete: “Tata Mokonzi oyo tozali na ye sikawa,” ezalaki . . . Bato boni bakanisi ezalaki nani? [Ndeko moko alobi: “Franklin Roosevelt.”] Franklin D. Roosevelt. Nalobaki: “Tata Mokonzi oyo totii na ebonga sikawa, akoponama ata mbala ya minei,” ezalaki mbala na ye ya liboso, na ntango wana, “akoponama na mbala ya minei, mpe tokomemama na Etumba ya Mibale ya Mokili Mobimba.”

²⁰² Nalobaki: “Mokonzi ya nkó oyo azali komata sikawa na Italy, oyo ezali Mussolini, akozua bokonzi. Akokende na Etiopia, pe Etiopia ekokwea na matambé na ye.” Bato mosusu bafandi awa sikawa, oyo bayebi, ete ezali na etonga moko ya bato moko bayaki mpe batelemaki wana, ntango nasalaki mayangani na Redman’s Hall, kuna na mpokwa wana, ntango nasengelaki kokende koteya yango kuna, na Redman’s Hall, mpe balingaki kobimisa ngai libanda na ndako yango, mpo nalobaki likambo ya lolenge wana. [Ndeko mwasi Wilson alobi: “Amen. Ya solo.”—Mok.] Iyo. Iyo. Mrs. Wilson, nayebi ete ozali . . . Ya solo. Ntango nalobaki bongo . . . Kasi asalaki yango? “Kasi,” nalobaki, “nsuka na ye ekozala na nsoni,” mpe asukaki bongo. Ye ná mwasi oyo azalaki kobika na ye, batiaki bango motó na nse makolo likoló mpe badiembisaki bango na singa moko na balabala, makolo na bango likoló, bilamba na bango kodiémbela. Malamumu, yango ekokisamaki.

²⁰³ Na nsima, nalobaki: “Basi bazui ndingisa ya kopono. Ezali mpenza nsoni mpo na ekólo. Mpe, nakoponáká, mokolo moko bakopona moto oyo asengeli te.” Mpe basalaki yango na maponami oyo eleki. Oh, oh! Minei. . . (Nalobaki: “Zebi

ekokende liboso na lolenge ete. . .”) Te, awa, oyo wana ezali ya misato. Bólimbisa ngai.

²⁰⁴ Oyo elandi, yango oyo, kuna, ya minei. Nalobaki: “Etumba na biso ekozala ná Allemagne, mpe bakotonga esika moko ya monene na betó, mpe bakomikwakasana na kati kuna, mpe ba-Amerika bakobetama na ndenge ya nsomo.” Nzambe na nguya nyonso ayebi, ete natelempi liboso na Ye sikawa, Namonaki banazi na bonsomi wana kobeta ba-Americaín kisambéti, lolenge wana, mpe nyonso wana, na etutú yango. Mpe bilenge mibali ebele batelemi awa sikawa, oyo bazalaki na Ligne Siegfried yango, oyo bayebi nini yango ezalaki. Mpe bómikanisela, wana ezalaki mibu zomi na moko liboso bátonga Line Siegfried. Nzambe azali solo? Alobaka kaka makambo liboso ekokisama? Bótala malamumu. Wana ezali, wana ezalaki ya minei.

²⁰⁵ Sikawa likambo ya mitano. “Zébi ekokende mpenza liboso na lolenge ete bakosala motuka oyo ekosengela kokambama na eyenda te. Mpe mítuka ekokoba kozua lolenge ya líki, kino na nsuka, na ntango ya nsuka. Namonaki libota moko ya ba-Americaín kokende, na nzela moko ya monene, bazali kotambola na motuka, bapesi mokongo na esika oyo eyenda esengelaki kozala, ezalaki lokola bazalaki kobeta lisano ya dame to ya kalati.” Mpe tozui yango. Ezali na televizió. *Science Populaire, Mechanics*, kútu, nyonso ezali na yango. Tozali na motuka yango. Etambwisamaka na telekomande, na—na radar. Bakozala ata na ntina ya kotia eyenda na kati na yango te. Osengeli kaka kobeta limeló boye, lokola otiaka na telefone, mpe motuka na yo ememi yo mbala moko; ekoki kotutana te, eloko moko te, ná mituka mosusu. Emá nde esalaka ete mituka mosusu ezala mosika na yo. Bomoni? Bazali na yango. Oh, la la! Bókanisa naino. Esakolamaki mibu ntuku misato liboso ésalema!

²⁰⁶ Sikawa, yango ememi biso na maponami ya Mokonzi Kennedy.

Mpe motuka oyo euti ko—kosalema, ememi makambo mitano (kati na nsambo) oyo ekokisami mpenza.

²⁰⁷ Sikawa, nalobaki liboso, mpe nalobaki: “Namonaki mwasi moko ya nguya kotelema, mwasi-kitoko, alataki bilamba ya motane-moindo ya bokonzi mpenza.” Natiaki mwa maloba na kati awa: “(Azalaki mokonzi monene na Amerika; ntango mosusu lingomba Katoliko.)” Mwasi, mwasi moko; nayebi te soko ekozala lingomba Katoliko. Nayebi te. Nakoki koloba te. Eloko bobele moko oyo namonaki, namonaki mwasi yango, esili.

²⁰⁸ Kasi oyo ezali ekólo ya mwasi. Ekólo oyo, motango na yango ezali zomi na misato, na lisakoli. Ezali na milongo zomi na misato, minzoto zomi na misato. Ebandaki na bayangelami zomi na misato. Zomi na misato, zomi na misato, nyonso ezali zomi na misato. Emonani kutu na mokapo ya 13 ya Emoniseli. Azali zomi na misato. Mpe ezali ekólo ya mwasi.

209 Bisambiseli ya koboma mabála na Amerika ebomaka mabála, ná basi na biso, koleka bikólo mosusu nyonso. Bomoto na ekólo na biso, mpe koboma mabála, ezali na nsé koleka na France to na Italy, esika kindumba esalemaka na balabala. Boye, kasi bango bazali basi ya ndumba; baoyo ya biso bazali basi babálá, nde bazolukáká kobika na mibali ebele, mpe mibali ebele babálá, nde bazolukáká kobika ná basi mosusu.

210 Na bikólo oyo bazalaka na mabála ya ndongó, ezali malamumu koleka mbala nkóto. Nzokande, libala ya ndongó ezali mabe, toyebi yango. Kasi, kaka mpo na kolakisa ndenge tobeki.

211 Nazali na eteni moko ya zulunále kuna, esika balakisaki ete ntango bilenge na biso ya Amerika bakendeki na mikili mosusu, na etumba ya nsuka oyo, ete koleka, nakanisi, ezalaki pene na ntuku nsambo likoló na mokama . . . Na bongo, sikawa, bózela naino, nakanisi ezalaki misato likoló na minei na baoyo bakendeki na mikili ya bapaya, basi na bango baboyaki bango liboso bázonga. Mpe bakomaki yango na nkoma ya minene na zulunale ete: “Nini ekómeli bomoto ya bato na biso ya Amerika?” Bozoyeba lisusu ete bomonaki yango? Bino nyonso bomonaki, nabanzi. “Nini ekómeli bomoto ya basi na biso ya Amerika?” Na ba-usines, bakómi kosala mosala kuna, ná mibali mosusu. Ezali ekólo ya basi. Akozua eloko nini? Mwasi-nzambe, to nzambe-ya-mwasi.

212 Sikawa, na bongo, nsima na yango, nabalukaki mpe natalaki. Mpe namonaki Amerika oyo kozika lokola liboke ya makala, mabanga epanzanáki. Ezalaki kozika lokola ma—makala ya nkoni minene, to eloko moko oyo epelisaki yango móto. Nabwakaki miso mosika mpenza, mpe esilaki kopanzana. Na bongo emononeli yango etikaki ngai. Mitano kati na misato esili kokokisama . . . to mitano kati na nsambo, nde, esili kokokisama.

213 Mpe eyaki kotalisama. Na bongo, nalobaki yango liboso ékokisama. Natikálá te koloba ete Nkolo nde ayebisaki ngai bongo, kasi, na kati ya losambo, na ntango wana, Nalobaki: “Lolenge makambo ezali kokende . . .” Nazongaki na nsuka moko ya etutu na bango, mpe napotáki kino na nsuka mosusu ya etutu. Nalobaki: “Lolenge makambo ezali kokende liboso, nakoloba liboso ete ntango . . . Nayebi te mpo na nini nazali koloba yango. Kasi nalobi liboso ete nyonso wana ekosalema na kati ya sikawa, 1933, mpe 1977.”

Mpe, kozanga koyeba yango, Nzambe ayebi motema na ngai, natikálá koyeba yango te kino lobi eleki, ete 1977 ezali yubile, mpe ntango moko wana mpenza ekoleka, oyo Apesaki na Yisraele, mpe nyonso wana, na nsuka. Boye, tokómi na . . . Mpe biso oyo na nsuka ya eleko, na boyingeli ya mpóso ya ntuku nsambo. Toyebi te ntango nini Lingomba ekokende. Oh, la la! Tósala nini, baninga? Tokómi wapi?

214 Bozomona nini yango tokómi sikawa? [Losambo balobi: “Amen.”—Mok.] Bososoli mpóso ya ntuku nsambo ya Danyele sikawa? [“Amen.”]

Bomoni, sikawa, na ntango tokoti na kati ya Bilembo oyo mpe nyonso wana, na bofungwami ya Bilembo. Ya liboso oyo ayei, ezali momati mpunda-mpembe, mpe azali na litimbo na loboko na ye. Bótala malamú soko moto yango azali nani. Bótala mpunda ya lángi lokola mai ya mpondu, oyo eyaki nsima na ye. Bomoni? Bótala soko ezali nani, mpe bótala ndenge bazali koya. Bótala nkóto na mokama na ntuku minei na minei wana koya. Bótala moseka oyo alali, ntango ayei. Bongo, bótala makambo nyonso oyo ezali kosalema: kosopana ya Mbeki, Malozi, milimo misato ya mbindo lokola kpodó. Bótala makambo yango kokokana mpenza na malozi wana, na ntango mpenza yango esopani. Mbala nyonso oyo Elembo moko efungwamaki, bolózi moko esopani, mpe libebi eyei. Mpe bótala likambo nini ekosalema sikawa, na nsuka.

215 Mpe, oh, bótala basakoli misato yango...to basakoli mibale yango, ntango bayei, awa. Mpe na katikati ya mpóso, balongolami, ndenge wana, na bongo, Etumba ya Amagedóna ebandi. Na bongo Nzambe Ye moko abandi koloba, na bongo, Atelemi mpe Abandi kobunda. Basakoli yango bazali kobeta mokili. Bazali koteya Nkombo na Yesu Klisto. Bazali kobatisa lolenge moko. Bazali kosala makambo ndenge moko na oyo bapantekotiste ya liboso, ba-tata basalaki, mpe bato mingi bazali kolanda bango. Kasi oyo esalaki likita, ebongiseli wana, ekobaki kokende, mpe ata nguya ya basakoli yango ebukaki yango te. Mpe sukasuka balobaki: “Tokosala bobele ebongiseli moko.” Mpe akotisi (ezali nini?) mbindo, Boroma, mpo na kopalanganisa likambo yango mobimba, oyo epesaka libebi. “Mbindo oyo epesaka libebi,” ekoti kati na nyonso, “bosoto.”

216 Bómikanisela, mobange mama ya pite, oyo afandi likoló na nyama, oyo alataki bilamba ya motane ndenge wana, azalaki na mitó nsambo mpe maseke zomi. Boyebi lisusu yango? “Asimbaki kopo na loboko, ya bosoto ya mbindo na ye.” Wana ezalaki mateyo na ye, oyo azalaki kopalanganisa epai na bato. Mpe wana nde tokomi, bandeko na ngai. Tokómi na ntango ya nsuka.

217 Bana mike, toyebi te, ntango mosusu tokozala na bomoi te, mpo na koya lisusu na mpokwa ya lelo. Ntango mosusu tokozala na bomoi te mpo na komona bamoko na bamosusu lisusu. Nayebi te. Kasi, nsuka ekómi mpenza pene, nsuka ebelemi mpenza. Likomi yango oyo. Yango nde ndanga mpenza oyo ebongi be, na nzela na Makomi.

218 Sikawa, soko eloko moko ezali, oyo ososoli te, komela ngai mwa mokanda mpe yebisa ngai yango. Bomoni? Loba likambo moko. Bayike kati na bino, bandeko oyo bozali kuna, koyoka bandede, na bangambo mosusu, soko eloko moko ezali, oyo nakoki

kosunga bino, bóyebisa ngai. Bokoki kozanga koyokana ná ngai, ngai mpe nakoki kozanga koyokana ná ebongiseli na yo; yo te, kasi lolenge ya ebongiseli na yo. Ezali te ete nayokanaka ná bato ya Katoliko te. Nalobi te ete nalingaka bato ya Katoliko te, ete nalingaka bato ya bibongiseli te. Ezali bongo te. Nalingaka bato nyonso, kasi nandimanaka te ná lolenge wana oyo ezokanga yo na boómbo. Nde oyo, lolenge na yango. Yango nde.

²¹⁹ Nazalaki kotelemela Allemagne te; ezalaki nde Nazisme. Nazalaki kotelemela bato ya Italy te; ezalaki nde kotelemela fa—Facisme. Mpe bómikanisela, nalobaki likambo mosusu liboso ésalema na ntango wana, kaka koloba liboso ésalema, mpe mingi na bino bato ya kala boyebi yango lisusu. Nalobaki: “Ezali na ba-isme minene misato ezoluka kokonza mokili lelo: Facisme, Nazisme, ná Communisme.” Mpe nalobaki nini? Nyonso wana ekosuka na kati ya Communisme.

²²⁰ Na bongo, nalobaki na bino nyonso ete bózongela koloba yango: “Bózala na miso na bino na Russia.” Boyebi lisusu yango? “Bózala na miso na bino na Russia. Akosuka mobimba na kati ya Communisme.”

Mpe nyonso wana ekosuka, sukasuka, na kati ya Bokatoliko. Bómikanisela, nyonso wana ekosuka na kati ya Bokatoliko, na ntango ya nsuka. Ezali mpenza ya solo. Ekosalema na Etumba ya Amagedóna, *awa* mpenza ntango Klisto Ye moko akoya.

²²¹ Kasi basakoli misato wana. . . Mibu misato na ndambo wana, nde, ezali na Emoniseli 11:3, batángá yango mbala mingi: “Nakopesa nguya na batatoli na Ngai mibale, mpe bakosakola na mikolo nkóto na nkama mibale na ntuku motoba.” Epesi boni, mikolo nkóto na nkama mibale na ntuku motoba? Mibu misato na ndambo. “Nsima na yango bakobomama na balabala,” na katikati mpenza ya mpóso ya ntuku nsambo.

Boye, bomoni esika mpóso ntuku nsambo ya Danyele ezali? Bomoni esika nini tozali kobika? Tokómi na nsuka, baninga na ngai ya bolingo. Tokómi na nsuka. Mikolo. . .

Bikólo ezali kopanzana, Yisraele ezali kolamuka,
Bilembo oyo basakoli basakolaki; (Tokómi wana.)
Mikolo ya Mabota ekómi ya kotánga, (*Awa*.)
etondi na nsomo;
“Bozonga, E bapalangani, epai na bino.”

Tóyemba yango:

Mokolo ya lisiko ebelemi,
Mitema ya bato ezali kosenzwa na nsomo;
Bótondisama na Molimo, minda na bino
élingelama mpe éngenga,
Bótombola miso! Lisiko na bino ebelemi.

Oh, la la! Ezali kitoko mingi te?

Bikólo ezali kopanzana, Yisraele kolamuka,
Bilembo oyo basakoli basakolaki;
Mikolo ya Mabota ekómi ya kotángá, etondi na
nsomo,
“Bózonga, E bapalangani, epai na bino.”

Sikawa elongo:

Mokolo ya lisiko ebelemi,
Mitema ya bato ezali kosenzwa na nsomo;
Bótondisama na Molimo, minda na bino
éléngelama mpe éngenga,
Bótombola miso! Lisiko na bino ebelemi.

Tika náyembela bino eteni moko ya moke.

Basakoli ya lokuta bazali kokosa, Solo ya
Nzambe bazali kowangana,
Ete Yesu Klisto azali Nzambe na biso;

Bazali kokómisa Ye Moto ya misato. Boyebi yango. Kasi,
Azali ya misato te. Azali Nzambe na biso.

Kasi tokolanda matambe ya bantóma.

Mpo mokolo ya lisiko ebelemi,
Mitema ya bato ezali kosenzwa na nsomo;
Bótondisama na Molimo, minda na bino
éléngelama mpe engenga,
Bótombola miso! Lisiko na bino ebelemi.

²²² Bozali na esengo te? Tózonga na Nsango, ndeko! Tózonga na
oyo ya ebandeli! Tózonga na pantekote! Tózonga na lipamboli
ya solosolo! Tózonga na Nkombo na Yesu Klisto! Tózonga na
libatisi ya Molimo Mosanto! Tózonga na bilembo mpe bikamwa!
Tózonga na pantekote! Tólongola ebongiseli! Tózonga na Molimo
Mosanto! Ye nde Molakisi na biso.

Mpamba te mokolo ya lisiko ekómi mpembeni,
Mitema ya bato ezali kosenzwa na nsomo;
Bótondisama na Molimo, minda na bino
éléngelama pe éngenga,
Bótombola miso! Lisiko na bino ekómi
mpembeni.

²²³ Ezali kitoko mingi, boye te? Mosakoli alobaki nini? “Ntango
moko ekoya, oyo ekozala, oyebi te soko ezali butu to moi.” Bótala
ndenge ezali kosalema. Bomoni? Oh, mabe mpenza, na bileko ya
lingomba!

Kasi e—ekozala Pole na ntango na mpokwa,
Nzela moke ya Nkembo bokomona yango solo;
Na nzela na mai nde Pole ezali lelo,
Wana okundami na Nkombo ya motuya ya
Yesu.

Bilenge mpe mikóló, bóyambola masumu na
bino nyonso,
Molimo Mosanto akokota solo;
Bapole ya mpokwa esili koya,
Ezali solo ete Nzambe ná Klisto bazali Moko.

Pole ekozala . . .

Biso nyonso elongo.

. . . na ntango ya mpokwa,
Nzela moke ya Nkembo bokomona yango solo;
Na nzela na mai nde Pole ezali lelo,
Wana okundami na Nkombo ya motuya ya
Yesu.

Bilenge mpe mibange, bóbongola mitema na
masumu na bino nyonso,
Molimo Mosanto akokota solo.
Mpamba te Pole ya mpokwa isili koya,
Ezali solo ete Nzambe na Klisto bazali Moko.
(Misato te; kasi Moko!)

²²⁴ Tózonga na Nsango! Tózonga na ebandeli! Tózonga na malakisi oyo Paulo ateyaki! Tózonga na libatisi oyo ye abatisaki na yango! Amonaki bato oyo babatisamaki ndenge mosusu; ayebisaki bango ete báya kobatisama lisusu. Alobaki: “Soko Mwanje moko auti na Likoló, ateyi ndenge mosusu, Álakama mabe.” Boye, tózonga na Nsango, moninga! Ekómi ntango ya mpokwa.

²²⁵ Oh, nalingi Ye mingi mpenza, boye te? Bato boni bamoni mpóso ya ntuku nsambo ya Daniele sikawa, mpe bamoni oyo mpóso ya ntuku nsambo yango ezali? Bato boni bandimi yango? Loba: “Amen.” [Losambo balobi: “Amen.”—Mok.] Amen! Nkembo na Nzambe!

²²⁶ Sikawa, likambo nini ekolanda? Bilembo Nsambo sikawa. Tokokota na yango noki-noki, ntango Nkolo akopesa ndingisa. Ekozala na ntango nini, nayebi te. Kaka ntango Akopesa yango, na bongo, tokobanda yango na mbala moko. Na bongo, tokosala losambo ya molai, ya molai mpenza, mpo ekosengela kobanda na mokapo ya 6 kino na oyo ya 19, mpo na kosilisa yango, mpe nakokende na yango malembe-malembe.

²²⁷ Sikawa, nalingi te ete moto moko ázonga wana asosoli likambo oyo mabe. Bande ezali naino koleka. Nalingi te ete moto moko ásosola mabe. Bósósóla mabe te sikawa, mpo na koloba ete: “Ndeko Branham alobaki ete Yesu akoya na mobu 1977.” Naticálá koloba likambo ya ndenge wana te. Yesu akoki

koya lelo. Kasi nalobi liboso ékokisama, ete na kati ya mobu 33 mpe 77, likambo moko ekosalema, ete makambo oyo namonaki kosalema, na emononeli, ekokokisama. Mpe mitano kati na yango esili kokokisama. Mpe nandimi, ná biloko ya atomiki oyo tokómi na yango sikawa . . .

228 Bomoni likambo oyo tata Mokonzi na biso auti koloba? Alingi etumba mosusu. Alingi kosala ndakisa moko uta—uta na Berlin, ndenge alobaki. Alingi kosala ndakisa. Ebongo Cuba oyo awa, na ekuke na biso ya nsima? Mpo na nini kokómisa yango ndakisa te? Ebongo oyo wana? Oh, ezali mpenza boléma! Bomoni?

229 Oh, ndeko, tokómi mpenza na nsuka. Bako . . . Ekosuka mpenza kaka ndenge Nzambe alobaki, boye, ntina nini—ntina nini kosala lolenge mosusu, na esika ya kotánga kaka oyo Alobaki, kokota na molongo, mpe komilengela mpo na yango. Mpe bótika yango éya. Tozali kozela yango.

Tozali kozila boyei ya Millennium, Mokolo ya nkembo,
Ntango Nkolo na biso akoya kozua Mwasi na
Ye ya libala, oyo azali kozila Ye;
Oh, mabelé ezali kokimela, kobelela ete
mokolo yango ya lisiko ékoka,
Ntango Mobikisi na biso akozonga na mabelé
lisusu.

Oh! Nkolo na biso azali kozonga lisusu na
mokili,
Iyo, Nkolo na biso azali kozonga na mokili,
Oh, Satana akokangama mibu nkóto,
Na bongo, tokomekama lisusu te,
Nsima na Yesu kozonga na mokili.

Bato boni bamilengeli? Bótombola maboko. Oh, la la!

Oh! Nkolo na biso akozonga lisusu na mokili,

Tótelema mpe tópesana mbote ya loboko.

Nkolo na biso akozonga na mokili,
Oh, Satana akokangama mibu nkóto,
Na bongo, tokomekama lisusu te,
Nsima na Yesu kozonga na mokili lisusu.

Oh! Nkolo na biso akozonga na mokili lisusu,
Iyo, Nkolo na biso akozonga na mokili lisusu,
Oh, Satana akokangama mibu nkóto,
Na bongo, tokomekama lisusu te,
Nsima na Yesu kozonga na mokili lisusu.

Bozongi ya Yesu ekozala eyano na bampasi
mpe kolela ya mokili,
Mpo boyébi ya Nkolo ekotondisa mokili, mbu
mpe likoló;

Nzambe akolongola bokono nyonso mpe
mpisoli ya mpasi ekokauka,
Nsima na Yesu kozonga na mokili lisusu.

Oh! Nkolo na biso akozonga na mokili lisusu,
Iyo, Nkolo na biso akozonga na mokili,
Oh, Satana akokangama mibu nkóto,
Na bongo, tokomekama lisusu te,
Nsima na Yesu kozonga na mokili.

²³⁰ Oh, la la! Bozali komiyoka malamau te? Bókanisa, baninga,
oyo nde pantekote, kokumbamela! Oyo nde pantekote. Tóbeta
maboko mpe tóyemba yango. Bato ya Pantekote, moto nyonso,
sikawa bómisembola, bólongola mimesano ya kala wana, ya ba-
Methodiste, sikawa. Tokei, tóyemba yango!

Oh! Nkolo na biso akozonga lisusu na mokili
lisusu,

Iyo, Nkolo na biso akozonga lisusu na mokili
lisusu,

Satana akokangama mibu nkóto,
Na bongo, tokomekama lisusu te,
ima na Yesu kozonga na mokili.

Oh! Nkolo na biso akozonga lisusu na mokili,
(Biblia elobi bongo!)

Nkolo na biso akozonga na mokili,
Satana akokangama mibu nkóto,
Na bongo, tokomekama lisusu te,
Nsima na Yesu kozonga na mokili lisusu.

Bolingi Ye? Malamau. Nalingi Ye. *Nalingi Ye*, Ndeko mwasi
Gibbs. Oh, tótombola kaka maboko sikawa epai na Ye.

Nalingi Ye, nalingi Ye

Mpo Alingaki ngai liboso

Mpe Asombi lobiko na ngai (Bipai wapi? Awa
na Kalvari mpenza.)

Likoló na nzete na Kalvari.

Nalingi Ye, (Nkembo!) nalingi Ye

Mpo Alingaki ngai liboso

Mpe Asombaki lobiko na ngai

Likoló na nzete ya Kalvari.



MPÓSO YA NTUKU NSAMBO YA DANYELE LIN61-0806
(The Seventieth Week Of Daniel)

MATEYA NA NTINA NA MPÓSO NTUKU NSAMBO YA DANYELE

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na ntongo, mwa 6, sanza ya Mwambe, na mobu 1961, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org